

## **REPELESIN** **Jon Day Niñiy Tikak** **Minim Nind Niņep**

Jon nuk bi Jiysis minim dand amemb bap. Baybol buk day kisen tikyak ak, Jon minj keykey onep mamind ak tikak. Minj tikak kun gok mey, Jiysis minim tep Jon ak tikiy; minj 1 Jon, 2 Jon, 3 Jon tikiy; minj Repelesin apun biy tikiy gak. Pen minj Repelesin tikak kun biy, nuk Gor minim aņđni dand amek, nup kalambis ay dam miñmon Patmos ñiņg timb kus gak ak ayey mindakniņ, Gor tap kisen giniņgamb gok biynimb mankumb biy niņyan aņgiy, day yomek niņiy tikak.

### **Minim Ar Keykey Mindip Rek:**

Minim nind aņgak ak mindip, chapta 1:1-8.

Krays Jon nup day yomek niņak rek, biynimb Gor ker mindyiņgipay miñmon onep ar ak minj keykey tikak minim ak mindip, chapta 1:9-3:22.

Minj day day komiy miñ onep ar ak ti-wniņgrimbikyak minim ak mindip, chapta 4:1-8:1.

Biykul onep ar ak keykey pungey, tap gak gok minim ak mindip, chapta 8:2-11:19.

Ñom nim ak sek, tap ayndik omiņal ak sek minim ak mindip, chapta 12:1-13:18.

Day niņak minim gunap tikak ak mindip, chapta 14:1-15:8.

Gor miluk niņiy miker onep ar ak yokniņgamb minim ak mindip, chapta 16:1-21.

Gor Babiylon kuyip timey giy; Seytan, tap ayndik, bi Gor minim yesek anjep gok sek, Gor yip penpen giy, kuyip taw achip achip giningamb minim ak mindip, chapta 17:1-20:10.

Gor kor yomb kisen niņningamb minim ak mindip, chapta 20:11-15.

Semb biyoņ sek, mankumb biy sek key kisenimb ay, Jerusalem kisenimb ak semb biyoņ nimb mankumb biy apek day niņak minim ak mindip, chapta 21:1-22:5.

Minim anņ jiwning minim anņak ak mindip, chapta 22:6-21.

<sup>1</sup> Minim tiksipiyn kun biy, nind misen ma niņyak. Yand Gor nup wonņ giņimbiyn rek, biynimb nup direp gipay gok, ñin maņ mindip giningamb rek niņyan anņiy, Ñinuk Jiysis Krays nup gos ñek, enjol nuk ak yokek apiy gek, day niņnik.

<sup>2</sup> Day niņnik kun ak, Gor minim gunap, Jiysis Krays kisen giningamb rek, minim junj gunap niņiy mey, nimbip aspiyn.

<sup>3</sup> Maņ mindip: day niņnik rek, kiņiņ giy gi dand amningamb ak mey, biynimb minim tiksipiyn kun biy riyt giningambay gok sek, biynimb riyt gey niņiy diningambay gok sek Gor gek, miņmiņ giningambay.

*Jon Biynimb Miņmon Onep Ar Ak Kuyip Minim Yokak*

<sup>4</sup> Yand Jon. Nimbip biynimb Gor ker Esiya propens, miñmon sikoy keykey onep ar ak mindpim gok, minj tiksipiyn. Yip tep giniñgamb ak, Gor bi nind mindek, miñiy mindip, kisen winiñgamb ak; nimbip simb niñiy, direp yimb ginimuñ. Kawnan nuk tam pikiy onep ar ayip ak, siya kiyn kiñiñ siñak mindip ak kunep, nimbip simb niñiy, direp yimb ginimuñ.

<sup>5</sup> Pen Jiysis Krays minim tep ak dand apiy, kiñiñ gi kumiy tikjakiy, kisen biynimb mañgiysek kond mindeniñgamb ak; nuk kunep nimbip simb niñiy, direp ginimuñ.

Nuk chinup simb niñiy kumak rek, kim amemb rek ayip.

<sup>6</sup> Nuk kiyn yomb chin ak mindakniñ, chin biynimb Gor nup simbonjep gok mindiy, nup direp giyiñg mindpun. Kun ak Jiysis Krays nup yimb ak, perper nep dand aranemb! Tep.

<sup>7</sup> Pen niñim! Nuk semb sek wakniñ, biynimb nup ñaŋgyak gok sek, biynimb miñmon okok mañgiysek nup misen niñniñgambay. Nup niñiy, yenen kun gipun aŋgiy, simb gek siy yomb yimb aŋniñgambay. Niñind kun giniñgamb! Tep.

<sup>8</sup> Gor Biyomb tap okok mañgiysek ginimuñ rek nep mindip ak aŋgip, “Tap okok mañgiysek junj ak mey, yand mindpiyn aŋgip.” Bi aŋgip kun ak, nind mindek, miñiy mindip, pen kisen winiñgamb.

### *Jon Kalambis Mindiy Jiysis Nup Niñak*

<sup>9</sup> Yand namam nimbik Jon. Chin mey, biynimb Gor diy kond mindeniñgamb gok mindpun. Pen biynimb yikop gok, chinup timey gey niñiy, nup

ma kirgiy, kilis yimb giy gon amjap. Yand Gor minim ak anğñiyiñg, Jiysis nup gosimb niñbiyn anğenik, yip kalambis ay, dam ñiñg solwara timb kus gak, miñmon Patmos ayak.

<sup>10</sup> Kun okok minden, Biyomb chin ñin yomb nuk bap apek, Gor Kawnan ak yip bak ayakniñ; kund yand okok ken minim yomb bap, biykul rek anğiy anğak,

<sup>11</sup> “Tap yerip gen niñnimin gok, minj tikiy, biynimb Gor ker mindpay miñmon keykey onep ar ak kuyip, yokey amnimuñ. Miñmon Yipiyses bap, Simena bap, Pegamam bap, Tayatayra bap, Sadiys bap, Piladelpiya bap, Leyodiysiya bap anğak.”

<sup>12</sup> Kun anğakniñ, yand bi minim asap kun ak niñiyn anğiy, andikiy niñnik: lam gol diy giyak onep ar ak mindek.

<sup>13</sup> Pen lam namb kun ak, Bi bap Ñinuk rek ak niñnik. Nuk chech paryomb yimb bap yimiy, gol diy giyak ler pis yomb ak, kond namb siñak pimbririkak.

<sup>14</sup> Jun kas nuk ak, tund yimb giy, kanj siypsiyp kas tund rek akan, semb tund rek ak ayak. Windin nuk ak, mon mañlan rek mindek.

<sup>15</sup> Tomb kind ak, tap kopa kilis ‘bras’ apay ak danğiyey, yiniy kilind dip rek ak gak. Pen minim nuk ak, ñiñg sinj yomb piñiy, giw anğip rek ak anğak.

<sup>16</sup> Ñin yipund kind nuk ak, gap onep ar ak di mindek. Pen ñayip baynat kind pis pis gak ak, meñg miñgan biyoñ arachakak. Jomluk nuk ak,

pumbnamb yon apiy, melik kind yimb angyi gip rek ak gak.

<sup>17</sup> Yand nup niñen nambin gek, tomb anjin nup siñak apyap memben yimiy, biynimb pisnep kumbay par rek ak mindenik. Kun genik, ñin yipund kind nuk ak yip diniñyng angak, “Ma pirikninin! Yand bi nind yimb mindiy, mind dand amiy, kisen mindnep mindeniñgayn.

<sup>18</sup> Yand mey bi permindep. Nind kumnik ak pen; niñan! Miñiy kim mindiy, perper nep mindeniñgayn. Biynimb kumiy kinjeñ tep ambay ak sek, kinjeñ timey ambay ak sek kiywur ak, yand kond mindpiyn.

<sup>19</sup> “Kun ak miñiy gisap rek niñiy, kisen giniñgamb rek niñiy, mañgiysek buk biyañ tiknimin.

<sup>20</sup> Pen tap niñsipan gok, minim kiñiñ nuk ak kun giy mindip: lam gol diy gayak onep ar niñsipan gok, biynimb Gor ker mindpay miñmon keykey onep ar ak. Pen gap onep ar ak, ñin yipund kind yand ar ak niñsipan gok, bi kuyip minim angnemb gok niñsipan angak.”

## 2

### *Yipiyses Biynimb Kuyip Minim Angak*

<sup>1</sup> “Pen bi Yipiyses biynimb Gor ker mindpay gok kuyip minim angnemb ak nup, minim tikiy angninin: Biyomb gap onep ar ak, ñin yipund kind nuk ar ak di mindyng, lam gol diy giyak namb okok tangip ak, minim angyip gok tiksipiyn.

<sup>2</sup> Nuk angyip: nimb mindrep giy, wong kilis giy gi dand amiy kosyam mindiy, pen yiruk ma

ninbim ak, ninbiyn. Biynimb timey gipay gok kuyip ninem, nimbip tep ma gip. Bi Jiysis minim dand amemb mindpun angyi, yesek apay gok kuyip ninrep giy, asikrep gipim.

<sup>3</sup> Yip chingem nimbip miker ñey, yiruk ma ninjiy chingiy nep mindpim ak, yip tep gip.

<sup>4</sup> Pen minim bap mindip. Yip nind chingiy wasemb yimb ayiŋgipim miñ ar ak, dam yokpim akay?

<sup>5</sup> Yip Biyomb chin angyi wasemb ayiŋgipim miñ tep kun ak, yenen kirpun angyi tip ak diy, mindrep giyiŋgipim rek mindenimimb. Mer ak, yand ap lam nimbip ak piliŋg diniŋgayn.

<sup>6</sup> “Pen ar bap girep gipim ak, yip tep gip. Biynimb Niykolas nup minim ak diy, miñ timey ar ak gey yip tep ma gip rek, nimbip kunep gip.

<sup>7</sup> “Nimb biynimb gos sek mindenimimb gok, Gor Kawnan ak biynimb nup ker mindpay miñmon keykey okok kuyip, minim angyi ak ninnimimb. Biynimb miker apek, gos kuŋay ma ninjiy, yip chingiy nep mindey, ñin kisen winiŋgamb ak kuyip angen, mon maŋgiy bind permindep Gor wonŋgday nuk biyon jakip ak diy, ñiniŋgambay angak.’ ”

### *Simena Biynimb Kuyip Minim Angak*

<sup>8</sup> “Pen bi Simena biynimb Gor ker mindpay gok kuyip minim anŋñemb ak nup, minim tikiy angnimin: Bi siŋok kumiy tikjakiy kim mindip ak; nind mindiy, mind dand apiy, mindnep mindeniŋgamb ak; minim angyi gok tiksipiyn.

<sup>9</sup> Nuk anġip: Yand niŋbiyn: Jiwda gunap, chin Jiwda yipund giy mindpun apay ak pen; Seytan biynimb nuk mindiy, nimbip minim diyiŋg mindpay. Miker nimbip yerip yerip mindip gok, yand kunep niŋbiyn. Nimb biynimb simbgeprek mindpim ak pen; yand niŋen biynimb gin yimb mindpim.

<sup>10</sup> “Nimbip miker giniŋg gisap ak, gos yomb ma niŋnimimb. Niŋim! Maŋ mindip; Gor nup chingrep gipay akan, apyap pikniŋgambay anġiy, Seytan gek; nimbip gunap di kalambis ayniŋgambay. Pen yip ker mindpim ak niŋiy, nimbip ñin onep wanjrem ak rek, gi timey giyiŋg mindeniŋgambay. Pen nimbip yerip giniŋg gey akan, pisnep pikayniŋg gey, gos yomb kun ak ma niŋnimimb. Yip chingiy nep mindem pikayniŋgambay ak, nimbip ar band tep wiyn giy diy, per mindeniŋgambay ak, tomb ñiniŋgayn.

<sup>11</sup> “Nimb biynimb timund sek gok; Gor Kawnan biynimb nup ker mindpay okok kuyip, minim anġip gok niŋrep ginimimb.

“Seytan nimbip nembnemb giniŋgamb ak pen; biynimb yip chingiy nep mindeniŋgambay gok, tip ak kumiy yiwur yomb dipay ak, ma diniŋgambay.”

### *Pegamam Biynimb Kuyip Minim Anġak*

<sup>12</sup> “Pen bi Pegamam biynimb Gor ker mindpay gok kuyip minim anġñemb ak nup, minim tikiy anġnimin: bi ñayip baynat nuk gol pis pis kind mindip ak, minim anġip ak tiksipiyn.

<sup>13</sup> “Nuk anġip: Yand niŋbiyn: nimb kosyam yimb mindpim. Biynimb miñmon nimb mindpim

namb ak, Seytan kond mindip. Pen nimb yip chingrep giy; minim yip ak direp yimb gipim. Miñmon Seytan kond mindip kun ak, namam Antiypas minj wong yip giñek, nup ñangyak ak pen, yip ma kirpik.

<sup>14</sup> Pen minim gunap mindip. Biynimb nimb gunap, Balam minim angñiyiñgip rek angñimbay. Bi Balam kun ak, Balak nup timund winjikek mey, am angek, Yisrel biynimb gok yip kirgiy, tap ñiñemb tap yikop simbongiyak gok ñimbyiñg, biyn siy bi siy giyiñg, giyak.

<sup>15</sup> “Pen nimb gunap bi Niykolas minim ak diy, miñ timey ar nup ak kisen giy, gem amimb.

<sup>16</sup> Kun ak, chin yenen kun gipun angiy kirgiy, yip chingrep ginimimb. Pen kun ma giniñgambim ak yand apiy, ñayip baynat meñg miñgan yand biyan nimb arachakip ak diy, biynimb kun gipay gok yip penpen giniñgayn.

<sup>17</sup> “Nimb biynimb gos sek mindenimimb gok; Gor Kawnan biynimb nup ker mindipay miñmon keykey okok kuyip, minim angip ak niñnimimb. Biynimb yip chingiy nep mindiy, mind dand amey, ñin kisen winiñgamb gok; tap ñiñemb semb biyon nimb, biynimb yikop gok ma niñbay ak, ñen ñiñiñgambay. Pen kuyip kamb tund gunap keykey ñiniñgayn. Kamb ñiniñgayn ar kun gok, yimb kisenimb ak keykey tik ñeniñgayn, biynimb diniñgambay gok nep niñiñgambay.”

### *Tayatayra Biynimb Kuyip Minim Angak*

<sup>18</sup> “Pen bi Tayatayra biynimb Gor ker mindipay gok kuyip minim angñemb ak nup, minim tikiy angnimin: minim biy Gor Ñinuk, bi siñok windin



mon manlan rek gakniņ, tomb kind nuk ak, kopa 'bras' apay ak danġiyey yin kilind dip rek, gakniņ niņbiyn ak; minim aņġip ak tiksipiyn.

<sup>19</sup> Nuk aņġip: nimb gipim miņ ar ak, yand niņbiyn. Yip chiņġiy wasemb yimb ay, wonġ giņiyiņġ nep mindpim. Gipim kun ak, nind siskoy giyiņġipim ak pen, miņiy tapin gipim.

<sup>20</sup> Pen minim bap mindip. Biyn Jesebel minim yesek aņġep ak, yand biyn Gor minim aņġep aņġek, nimb nup yenen kirgem, biynimb yip gok kuyip, minim yesek aņġakniņ, tap keņmanġiy dam tap yikop simbonġ ñimbay gok ñimbyiņġ, biyn siy bi siy giyiņġ gipay.

<sup>21</sup> Nuk gip miņ timey ar kun ak kirġiy, mindrep ginimun aķan aņġiy, niņmind mer niņiy kirpiyn.

<sup>22</sup> Kun gip rek pen gen, miņak yomb giniņġamb. Biynimb nup kindik gipay kun gok, yenen kun gipun aņġiy ma kirgey, kuyip kunep gen miņak yomb giniņġamb.

<sup>23</sup> Biynimb nup pisnep kisen gipay gok kuyip pikayeniņġayn mey, biynimb yand miņmon keykey mindpay rek, yip niņrep giy aņġniņġambay, 'Nuk gos timund namb kuyip biyan niņrep yimb giy nep, biynimb gok bilokip aņġniņġambay.' Kun gipiyn rek, nimbip nokom nokom maņġiysek gipim rek niņiy, pen kun ak rek ñiniņġayn.

<sup>24</sup> "Pen nimb Tayatayra biynimb gunap, biynimb aņġambiyn gok, Seytan nup kilrimey simbonġinjun aņġiy niņbay rek niņiy ma gipim ak mey; minim miker nimbip gunap ma mindip.

<sup>25</sup> Pen yip chiņġipim miņ ak chichiy di mindem

mindem, kisen yand ninim!

<sup>26</sup> Biynimb yip chingiy nep mindiy, miker yomb apek ma kirginingambay gok kuyip angen, yand yip biynimb miñmon keykey okok kuyip kond mindeningambun.

<sup>27</sup> Yenen, Bapiy minim bap yip angyi angak: ‘Yand angen, ayen kur bap diy, singey tiyn gok pikjispuk giy, biynimb miñmon keykey gok kuyip kond mindeningamb angak.’

<sup>28</sup> “Pen biynimb mindrep giningambay kun gok kuyip, gap poŋglin tep miñmon tirgum tikakniŋ, niŋbay rek ak ñiningayn.

<sup>29</sup> Nimb biynimb gos sek mindenimimb gok, Gor Kawnan biynimb nup ker mindpay miñmon keykey okok kuyip, minim angyip kun gok niŋnimimb.”

### 3

#### *Sadiys Biynimb Kuyip Minim Angak*

<sup>1</sup> “Pen bi Sadiys biynimb Gor ker mindpay gok kuyip minim angyñemb ak nup, minim tikiy angnimin: minim biy bi siŋok, Gor Kawnan tam pik onep ar ay, gap onep ar ak sek di mindip ak, angyip rek tiksipiyn. Miñ nimb yerer gipim ak niŋbiyn. Biynimb gok niŋey, yip ker mindpim rek ayip ak pen; yip ker ma mindpim rek ayip. Pisnep kumbim rek ayip ak pen, ñekñek band nimbik ak mindip rek,

<sup>2</sup> wisin kil kinjipim ak kirgiy, tikjakiy Gor angyip miñ ar ak ginimimb. Miñ nimb gipim ar ak Gor niŋek tep ma gip.

<sup>3</sup> Kun ak minim tep aňgñeyak niňiy dipik ak, yenen kirpun aňgiy, tip ak diy, mindrep ginimimb. Biyomb ak kasek ma winiňgamb aňgiy, wisin kil kin mindeniňgambim ak; yand bi tap siy dep gok niňmindey ma opay rek ak apen, niňiy jiw diniňgambim.

<sup>4</sup> “Pen nimb Sadiys biynimb gunap niňrep gipim. Chech nimb gok gem gach ma gip. Nimb biynimb yand yimb gok mey, chech tund ay, yand yip taňgoniňgambun.

<sup>5</sup> Biynimb yip ker mindiy, miker diyiňg, yip chingi nep gey amniňgamb gok, chech tund tep kun ak rek ayñiniňgayn. Pen yimb kuyip permindep buk biyaň tikayen mindip ak, ma wiykyokniňgayn; Bapiy sek, enjol nuk gok sek yip niňmindyakniň, yip ker mindpay aňgiy, misen aňgñiniňgayn.

<sup>6</sup> “Nimb biynimb gos sek mindenimimb gok, Gor Kawnan biynimb nup ker mindpay miñmon keykey okok kuyip, minim aňgip kun ak niňnimimb.”

### *Piladelpiya Biynimb Kuyip Minim Aňgak*

<sup>7</sup> “Pen bi Piladelpiya biynimb Gor ker mindpay gok kuyip minim aňgñemb ak nup, minim tikiy aňgnimin: minim biy bi suňrep; minim niňind yimb aňgiy, kiyaň Depiyt kiywur di mindyiňgip ak, di mindip anep aňgek tiksipiyn.

Nuk aňgip: yand kinjeň yiken, biynimb gunap giñiniňgiy rek ma ayip; pen giñen, yikniňgiy rek ma ayip.

<sup>8</sup> Nimb gipim rek niňiy, nimbip kinjeň yikpiyn ak mey, biynimb gunap giñiniňgiy rek ma ayip.

Nimb biynimb kuṅay ma mindpim ak pen; minim yip ak ma kirgiy, yip chingiy nep mindpim.

<sup>9</sup> Pen niṅim: biynimb chin Jiwda yipund giy mindpun anḡiy yesek apay gok, Seytan ker mindpay ak mey, kuyip anḡen, tomb anḡin nimbip siṅak koṅim yimiy, jiy kuyangiy anḡniṅgambay, ‘Nimbip nep mey, Kiyṅ yomb key yimb ak biynimb yand anḡiy, wasemb ayip gok mindpim anḡniṅgambay.’

<sup>10</sup> Nimbip timey gey, apiyn rek yip chingiy nep mindpim ak, biynimb mankumb biy kuyip maṅgiysek, miker ñiniṅgayn ñin ak, nimbip sek ma ñiniṅgayn.

<sup>11</sup> “Maṅ mindip niniṅgayn. Yip chingiy mindpim rek, chingiy nep mindem mey, biynimb gunap gey ma apyap pikniṅgambim; pisnep mindrep giniṅgambim.

<sup>12</sup> Biynimb an yip ker mindey kuyip timey gey, gos kun ak ma niṅiy, yip chingiy nep mindeniṅgambay gok; kuyip gen, Gor anḡniṅep korip sap yomb gok rek mindiy mey, yikop okok ma giranḡeniṅgambay. Wak ar kuyip ak Bapiy nup yimb ak tikiy, dawin yomb nuk Jerusalem kisenimb ak tikiy; yimb yand kisenimb ak tikiy giniṅgayn.

<sup>13</sup> “Nimb biynimb gos sek mindenimimb gok, Gor Kawnan biynimb nup ker mindpay miñmon keykey okok kuyip, minim anḡip kun gok niṅnimimb.”

### *Leyodiysiya Biynimb Kuyip Minim Anḡak*

<sup>14</sup> “Pen bi Leyodiysiya biynimb Gor ker mindpay gok kuyip minim anḡñemb ak nup, minim

tikiy aņgnimin: Minim biy, Biyomb tap okok maņgiysek gay, Nop aņgip rek giy, minim niņind yimb nep aņgip ak, aņgek tiksipiyn.

<sup>15</sup> “Nuk aņgip: miñ nimb gipim ak yand niņbiyn. Yip pisnep ma chingipim: pisnep ma kirgipim. Yip gosimb ar ar nep niņiy, mindrep gispun aņgiy niņbim ak, nimbip yepiynim rek ayip.

<sup>16</sup> Yip pisnep ma chingipim; pisnep ma kirpim rek niņiy, nimbip wokyokniņg gispiyn.

<sup>17</sup> Nimb apim, “Chin mindrep gipun. Tap chin kuņay mindip; tap bap ma tikdip apim ak pen;” minim ma niņbim ak: nimb biynimb windin koy giy, daynep mindiy, simbgeprek mindpim.

<sup>18</sup> Kun ak mey, niņrep ma gipim rek, minim yand apiyn ar ak diy, windin malasın yip ak tawiy aynimimb. Nambiņ gakniņ mindpim rek, chech tund tep yip ak tawiy aynimimb. Pen gol daņgiyen yiniy, day day sek ma mindip ak tawiy mey, mindrep giniņgambim.

<sup>19</sup> Biynimb wasemb aypiyn gok timey gey, kuyip ma kirpiyn; mindrep giyaņ aņgiy, miker ñiying timund winjikpiyn. Kun ak yenen kun gipun aņgiy kirgiy, mindrep ginimimb.

<sup>20</sup> Niņim! Yand ap mis akyaņ mindying, yip an rek aņgdinimuņ aņgiy, kinjeņ pikgiygiw giying kond mindpiyn. Biynimb minim yip ak niņiy, aņgey korip miņgan amniņgayn gok: yand kiy yip tap ñimbiy; kiy pen yand yip tap ñimbiy, jimñiy mindoniņgambun.

<sup>21</sup> “Seytan yip miker yomb ñak ñin ak, Bapiy nup minim ak ma kirginik; aņgak rek nep gi

dand amen mey, Bapiy yip anġ dam siya kiyġ nuk mindip ar ak ayak. Kun ak rek, biynimb Seytan kuyip miker ñek, yip chingiy nep mindeningambay gok, kuyip anġ dam siya kiyġ yand ar ak ayniġayn.

<sup>22</sup> “Nimb biynimb an gos sek mindenimimb gok; Gor Kawnan biynimb nup ker mindpay miñmon keykey okok kuyip, minim anġip kun ak niñnimimb anġak.”

## 4

<sup>1</sup> Pen minim tikpiyn kun ak day niñdiy, tip ak niñnik: Gor miñmon biyoġ kinjeġ yikiy mindek. Nind biykul rek anġek niñnik ak, tip ak anġiy yip anġak, “Ar biy apey, tap kisen giniġgamb gok nip yomiyn anġak.”

<sup>2</sup> Kun anġakniġ, Gor Kawnan ak ap yip bak ayakniġ niñnik: semb biyoġ Biyomb bap siya ar siñak bişiġ mindek.

<sup>3</sup> Mumbwak jomluk nuk ak mokyaġ ñiluk yimb ak giy, kum gondmay bi rek ak mindakniġ, tiybeñ ak nup gaw giy, guñgiñ pañgiñ giy, yirik yapyiġ mindek.

<sup>4</sup> Siya nuk ak namb biyaġ mindakniġ, biyomb bişiġipay siya onep ñin ġiwiy andikiy nokom bap ay kus giyak. Biyomb minim tunġasikep gok chech tund yimiy, gol diy giyak ar band gok keykey ay, bişiġ mindeyak.

<sup>5</sup> Biyomb yimb ak bisgak siñak, añiñak diyiġ, timuk yomb anġnep mindakniġ, giw anġek parsek amnak. Kiñiġ kun siñak sup melik onep ar ak melik gi mindek. Sup melik kun gok mey, Gor Kawnan nuk ak rek.

<sup>6</sup> Biyomb kiyn siya nuk mindek kiñiñ siñak, kamb kilmenjik ak galas rek, kind yimb aņgiy mindek. Siya bak nuk ak, bi kiyn man ar biy nimb kamb tap yikop gok diy, kayn ayndik tap gok gayey mindip rek ma mindek; tap kim mindep omiñal omiñal jak mind kus giyak. Tap kun gok windin kund okok mindiy, wiñ okok mindiy gak.

<sup>7</sup> Tap kim mindep kun gok, bap kaw ñiluk rek ayak, bap layon rek ayak, bap biynimb jomluk rek ayak, bap yakir duk pil parsek aytapay rek ayak.

<sup>8</sup> Pen tap kun gok maņgiysek pilkind onep kañgol ak ayak. Windin kuñaynep: ar okok diy, wiñ okok diy maņgiysek yiwgak. Pen pumbnamb kisyimken, kamep aņgnep mindyিং apay:

“Nuk bi suñ-tep!

Nuk bi suñ-tep!

Nuk bi suñ-tep!

Gor Biyomb yimb!

Tap magep bap ma mindip; yerip yerip giniñ giniñgamb!

Nind yimb yimb mindiy, mind dand apiy, miñiy mind nep mindip!

Kisen tip ak winiñgamb apay.”

<sup>9</sup> Pen tap kim mindep keykey omiñal omiñal kun gok, Biyomb ak nup tep aņgyiñg yimb dand aranyakniñ,

<sup>10</sup> biyomb minim tungasikep ñin jiwiy andikiy nokom bap aņgambiyn gok; ar band kiyk gok tungjiw nuk mindip siñak yokiy, koņgim yimiy, Biyomb yimb ak perper mindeniñgamb aņgyiñg, yimb dand aranyiñg apay:

11 “Gor Bapiy yomb chin!  
 Nand tap okok maŋgiysek gaynak.  
 Nand Biyomb, tap ma ginimin rek bap ma  
 mindip.  
 Yimb nip dand aranemb.  
 Nand mindey mey; biynimb mindiy, tap yerip  
 yerip okok mindiy gip apay.”

## 5

### *Jon Buk Miñ Komyak Bap Niñak*

<sup>1</sup> Pen niñnik: Biyomb kiya ak buk minj paryomb day day komyak bap, ñin yipund kind ak di mindek. Buk minj komyak kun ak, yimb gok mis ar okok ken tikiy, miñgan akyañ ken tikiy giyak. Pen day day komiy, miñ keykey onep ar ak tiwningrep yimb giyak.

<sup>2</sup> Giyak kun ak niñnikniñ: Gor enjol nuk yomb yimb bap aŋgek apiy, suk yomb aŋgiy aŋgak, “Biyomb an rek miñ ayak biy wisikiy, buk kun biy mikal giniñgamb?”

<sup>3</sup> Kun aŋgak ak pen, biynimb semb biyoñ akañ, mankumb biy akañ, molik nukyañ gunap akañ, buk minj kun ak mikal giniñniñgiy rek bap ma mindeyak.

<sup>4</sup> Kun gek niñen, simb gek siy aŋgnik.

<sup>5</sup> Pen bi minim tungasikep mindeyak gok bap yip aŋgak, “Siy ma aŋgnimin. Bi kayn Layon kilis rek bap mindip. Nuk Jiwda nimb: kiyañ Depiyt tikek tik dand amiy, nup tikiyak. Nuk Biyomb mindip rek, buk kun ak miñ wisikiy, mikal giniñgamb aŋgak.”

### *Jon Siypsiyp Ñiluk Ak Nup Niñak*



<sup>6</sup> Kun angakniņ niņnik: Siypsiyp Ñiluk ñangayey kumiy tikjakak rek bap, mindek siya kiņņ namb siņak. Siypsiyp Ñiluk kun ak kom onep ar ak, windin onep ar ak ayak. Windin onep ar ayak minim junj ak, Gor Kawnan nuk yokek, miñmon okok maņgiysek kind kind amimb.

<sup>7</sup> Pen Siypsiyp Ñiluk ak Bi kiņņ yomb bisgak kiñiņ siņak amiy, buk minj komiy ñin yipund kind okok ken di mindek ak dak.

<sup>8</sup> Dakniņ, tap pilkind onep kaņgol ayak gok sek, biyomb minim tuņgasikep gok sek ap, mindek siņak koņgim yimyak. Biyomb minim tuņgasikep kun gok kiyk, tap giyta rek gok keykey diy, diys gol diy giyak gok keykey di mindeyak. Diys di mindeyak miņgan kun gok, tap daņgiyey yin sikum giy kuyrep wip ak, arachakiy mindek. Tap Gor nup daņgiyey yin kuyrep wip kun ak; biynimb gok Gor nup aņgniņey, nup tep gip rek ak.

<sup>9</sup> Pen kiyk kamep kisenimb bap aņgiy aņgyak, “Nand kumiy tikjakiy, biynimb miñmon keykey mindpay rek, kiñiņ keykey mindpay rek, minim yimb keykey apay rek, wak keykey ayak rek gunap Gor ker dinak ak mey, nak nep buk komiy tiwniņgrop gak kun ak, wisikiy mikal giy niņnimin rek mindip.

<sup>10</sup> Pen kuyip direp gipan kun ak, kiyk Gor chin ak nup woņg giñi mindiy, kisen nand yip, biynimb mankumb biy kuyip maņgiysek, kond mindeniņgambim aņgyak.”

*Siypsiyp Ñiluk Ak Nup Yimb Dand Aranyak*

<sup>11</sup> Pen tip ak niñiy niñnik: enjol ñin jiwiy ñin jiwiy, tawsin miyliyón kuñay yimb nep, ap Gor siya kiñ nup ak sek, tap kim mindep pilkind onep kañgol ayak gok sek, bi minim tungasikep gok sek kuyip piñiy kus giy,

<sup>12</sup> meñg miñgan dand araniy kamep angying angyak:

“Siypsiyp Ñiluk Gor nup simbongning kumak ak,  
nuk bi tep yimb.

Nuk mey; biyomb yimb,  
mindrep yimb gip,  
gos tipangiy niñimb,  
yerer gining giningamb.  
Nup bi yimb sek angyi,  
yimb dand araniy,

bi tep yimb angingiy angyak.”

<sup>13</sup> Pen niñnik: tap Gor gayak, semb biyong, man biy, lum namb nukyan, ñing solwara namb okok mañgiysek kamep angyi angyak, “Biyomb siya kiñ bisgip ak sek, Siypsiyp Ñiluk ak sek gos tipangiy niñbiyr rek, yimb kuyip apiymiñay ak perper dand aranemb angyak.”

<sup>14</sup> Kun angeyak, tap pilkind onep kañgol ayak gok angyak, “Niñind apay!” Kun angeyak, bi minim tungasikep gok kongim yimiy, kuyip apiymiñay yimb dand araniyak.

## 6

### *Siypsiyp Ñiluk Ak Miñ Onep Ar Ak Wisikak*

<sup>1</sup> Pen niñmindnikniñ, Siypsiyp Ñiluk ak, Nop buk komiy miñ tiwning wosgek di mindek ak, miñ day biy ak wisikakniñ, tap pilkind onep kañgol

ayak gok, bap minim yomb timuk anġip rek anġiy anġak, “Owan!”

<sup>2</sup> Anġek niġnik: kanj hos tund bap arachakak. Bi hos ar kun ak bisiġ mindek ak, Gor gek wiyn ginimuġ rek nep ayek mey, nup arband wiyn giy dipay ak ayñek, chim ak dand miñmon okok amiy, biynimb gok yip penpen giy, ñanġjiw yokniġ amnak.

<sup>3</sup> Pen Siypsiyp Ñiluk ak, miñ namb ak wisikakniġ, tap pilkind onep kanġol ayak bap pen anġak, “Owan!”

<sup>4</sup> Anġek niġnik: kanj hos likañ bap arachakak. Gor bi hos ar biyoġ bisiġ mindek ak nup baynat yomb bap ñek, nuk am gek, biynimb miñmon okok maġiysek kapkap mindeyak ak kirgiy, penpen ñanġyiġ gey amnak.

<sup>5</sup> Pen Siypsiyp Ñiluk ak, miñ namb kanen ak wisikakniġ, tap pilkind onep kanġol ayak bap pen anġak, “Owan!” Anġek niġnik: hos mosimb bap arachakak. Bi kanj hos ar kun ak bisiġ mindek ak, tap keñmaġiy sikel aypay bap di mindek.

<sup>6</sup> Minim bap, tap pilkind onep kanġol ayak gok mindeyak namb siġak nimb anġiy anġak, “Yiwan yomb winiġgamb rek, maniy kind nokom dand amiy, tap kuġay tawyiġipay rek ma tawniġgambay. Wiyt maġiy tawniġ, kaw nokom bap nep tawniġiy; pen baliy maġiy tawniġ, kunep kaw omiġal nokom nep tawniġiy. Pen oliyp wel ak sek, ñiġ wayn ak sek per tawpay rek, tawniġiy anġak.”

<sup>7</sup> Pen Siypsiyp Ñiluk ak, miñ tiġawip ak wisikakniġ, tap pilkind onep kanġol ayak kisen

ak angak, “Owan!”

<sup>8</sup> Angek niñnik: kanj hos pik bap arachakak. Bi hos ar kun ak bisinj mindek ak, yimb nuk “Kumemb”; pen binuk yip apek ak, yimb nuk “Chip-kawnan-korip.” Gor gek mey, bi omiñal kun ak ar keykey ger, biynimb miñmon okok kuñaynep kumningiy rek ayak. Gunap penpen ñangiy kumningambay, gunap yiwand yomb apek kumningambay, gunap miñak tap okok gek kumningambay, gunap kayn ayndik tap sakiy okok siw ayey kumningambay. Kun giy kum dand apiy mey, biynimb mankumb biy mindpay kuñaynep rek kumningambay, pen kuñaynep yimb mindeningambay.

<sup>9</sup> Siypsiyp Ñiluk ak, miñ mamind ak wisikakniñ niñnik: Gor nup simbonjep bind beñ ak, biynimb Gor minim tep nup niñiy deyak, kuyip ñangayak kawnan gok mindeyak.

<sup>10</sup> Kiyk suk yomb angyi angyak, “Gor. Nand Biyomb kilis yimb. Bi suñ-tep, niñind yimb ar ak nep gipan! Pen ñin yerip yerip mindiy, biynimb lum ar biyan, chinup ñangayak gok kuyip, kor giy, yiwur ñiningamban?”

<sup>11</sup> Kun angyakniñ, enjol gok kuyip chech tund par keykey ñiyiñg angyak, “Man mindip; kond mindenimimb. Namam nanay Gor nup direp gipim rek gipay gok, gunap sek pikayey mey, Gor ñin pañgayak namba ak amek, aspim rek giningamb angyak.”

<sup>12</sup> Pen Siypsiyp Ñiluk ak, miñ kangol ak wisikakniñ niñnik: monmon yomb sikerek ak dakniñ, pumb ak, wand anjil mon yiniy gach gip

rek ak gek, takin ak pisnep likañ yimb gak.

<sup>13</sup> Gap gok, pinim kilis ak diy, kiyaw mañgiy pik ma gip gok, pirmar giyowip rek ak yowyak.

<sup>14</sup> Pen semb biyoñ mat ak pañg aypay rek ak gak. Miñmon yirik gok sek, miñmon ñiñg timb kus gak gok sek mindyñgipay tip ak kirgiy; liñg keykey amniyak.

<sup>15</sup> Kun gakniñ, kiyañ miñmon keykey gok, biyomb yikop gok, amiy bi kond mindeyak gok, biynimb gin yimb gok, biynimb yimb ma mindek gok, kalambis mindeyak gok, biynimb kalambis ma mindeyak gok mañgiysek, pirik am kamb miñgan man miñgan okok weygiyak.

<sup>16-17</sup> Weygiy añgyak, “Biyomb siya ar bisiñg mindip ak sek, Siypsiyp Ñiluk ak sek chinup yiwur yomb ñiniñgayr ñin kisen per apun ak wip ak mey, mindenjun rek ma ayip. Kamb puñgjiwiyañ akan, miñmon yirik yomb guniy pañg apiy, chinup pisnep yiwginimuñ ak, tep yimb añgyak.”

## 7

### *Yisrel Biynimb Kuñaynep Gor Kil Nup Ak Diyak*

<sup>1</sup> Pen tip ak niñnik: enjol onep tiñgawip ak; pinim diy, mankumb, ñiñg solwara, mon, tap okok timey ma ginimuñ añgiy; day keykey tim giyak.

<sup>2-3</sup> Enjol bap pen pumb lim gip okok nimb, Gor tap kil tikayep nuk ak dand apiy, biynimb nuk gok kuyip kil tikayniñg, enjol pinim gey winiñg gek gok kuyip añgak, “Aland gim! Biynimb Gor nup direp gipay gok mañgiysek, kil nup ak awinben

kuyip biyon tikayonjun; kisen pinim ak yepyem, ap ñiñg solwara, mankumb, mon tap gok gi timey ginimun angak.”

<sup>4</sup> Pen minim bap angyak: biynimb Gor kil nuk awinben biyon tikayningambay kun gok, Yisrel biynimb kiñiñ keykey gok jimñiy, wan handret powtiy pow tawsin rek.

<sup>5</sup> Biynimb kun gok, Jiwda kiñiñ ak nimb 12,000; Riwbryn kiñiñ ak nimb 12,000; Gat kiñiñ ak nimb 12,000;

<sup>6</sup> Esa kiñiñ ak nimb 12,000; Naptalay kiñiñ ak nimb 12,000; Manase kiñiñ ak nimb 12,000;

<sup>7</sup> Simiyon kiñiñ ak nimb 12,000; Liypay kiñiñ ak nimb 12,000; Ayseka kiñiñ ak nimb 12,000;

<sup>8</sup> Sebyiwan kiñiñ ak nimb 12,000; Josep kiñiñ ak nimb 12,000; Benjamen kiñiñ ak nimb 12,000 ak mey, jimñiy wan handret powtiy pow tawsin rek.

<sup>9</sup> Pen tip ak niñiy niñnik: Biyomb siya kiyn yomb bisgak ak sek, Siypsiyp Ñiluk ak sek mindrikniñ, biynimb kuñaynep ap windin yirik ar kuyip siñak mindeyak. Biynimb kun gok, miñmon keykey ayak rek, kiñiñ keykey ayak rek, wak keykey ayak rek, minim yimb keykey apay rek, okok nimb okok nimb apiy mindeyak. Biynimb ñin pañgep rek ma mindek kun gok, mañgiysek chech tund nep ay, alband kas di mindyng,

<sup>10</sup> Gor nup yimb ak dand aranyng, suk yomb angyi angyak, “Biyomb siya kiyn bisgip ak sek,

Siypsiyp Ñiluk ak sek chinup tawasikrik rek mey, kim amningambun angyak.”

<sup>11</sup> Enjol gok mañgiysek ap, bi siya kiyñ yomb bising mindek ak sek, bi minim tungasikep gok sek, tap kim mindep onep tingawip gok sek kuyip piñiy kus kus giy, apyap kongim yimiy, jiy kuyangiy, Gor nup yimb ak dand aranying,

<sup>12</sup> angyak:

“Niñind yimb aspun!

Gor Biyomb chin ak, yimb nup ak perper nep dand aranjun.

Nuk Biyomb yimb;

Bi gos tipangiy niñimb.

Nup tep angyi,

yimb dand aranying,

chinup kond mindonimun angey mey,

biynimb gok kuyip perper nep kond mindonimun.

Nimbip niñind yimb aspun angyak.”

### *Tip Ak Yiwur Ma Diniñgambay*

<sup>13</sup> Pen biyomb kun gok bap, yip angninijiy angak, “Biynimb chech tund teprep aypay kun gok nand niñban? Pen kiyk akay nimb opay?”

<sup>14</sup> Angek angnik, “Biyomb. Yand ma niñbiyn; yip angñan angnik.” Kun angen, yip angak, “Biynimb guniy kuyip miker ñey, kosyam yimb mindiy opay. Pen kiyk Siypsiyp Ñiluk likañ ak diy, chech kiyk gok wasyim gey, tund gip.

<sup>15</sup> Kun ak mey, kiyk Gor siya kiyñ kiñiñ namb siñak mindyong, pumbnamb kisyimken korip nup angninjep miñgan ak wonj giñiyong, yimb

nup dand aranying gipay. Bi siya kiyη bisgip kun ak, kuyip kond mind tep yimb giningamb.

<sup>16</sup> Kuyip yiwan ma giningamb, ñing nen ma giningamb, pumb sinjrimey niñiy yiwur ma giningamb.

<sup>17</sup> Yenen: Siypsiyp Ñiluk siya kiyη kiñing yimb sinjak mindip ak, kuyip kond mindrep giningamb. Kuyip ponjind ñing kilam jiwningamb okok amek, ñing permindep ak ñingningambay. Pen Gor siy ñing kuyip ak mañgiysek, wiykyokningamb angak.”

## 8

### *Siypsiyp Ñiluk Ak Miñ Ar Ak Wisikak*

<sup>1</sup> Pen Siypsiyp Ñiluk ak, miñ nokom mindek ak wisikakniñ, semb biyη kilpul ma giy, yep won bap yikop mindek.

<sup>2</sup> Pen niñnik: enjol onep ar ak, Gor windin yirik ar sinjak jak mindeyak. Enjol kun gok kuyip biykul keykey ñek, di mindeyak.

<sup>3-4</sup> Enjol bap pen tiyn tep gol diy giyak won bap diy, Gor nup tap pik simbonqipay bind ar gol sinjak jakiy mindek. Nup tap dañgiyey yin kuyrep wip ak kuñaynep ñeyak, di Gor bind nup gol diy giyak ar ak dañgiyek, sikum ak yin aranying, Gor biynimb nup aņgninyak minim ak sek yingong giy, aran amnak.

<sup>5</sup> Pen gol diy giyak tiyn won kun ak diy, mon binj Gor nup simbonqep bind ar biyη yinek gok, di tiyn miņgan biyaņ ayek arachakek, di mankumb ar biyaņ yokek; monmon apiy, añiñak diying, timuk aņgying, aņgek parsek amnak.



*Biykul Gok Punḡning Geyak*

<sup>6</sup> Won kun ak, enjol onep ar biykul di mindeyak gok, dand araniy punḡning geyak.

<sup>7</sup> Enjol nind ak, biykul nuk ak punḡek, mon maḡlaḡ ak sek, dikiy niḡgomb maḡgiy ak sek likaḡ kom kom giy, man ar biy songyowak. Pen songak kun ak; mankumb biy day omiḡal nokom rek aḡgiy, day omiḡal rek mindek, day nokom bap, mon, tap kas kim kim jak mindek gok, maḡgiysek yin simbok amnak.

<sup>8-9</sup> Pen enjol namb ak, biykul nuk ak punḡek; miḡmon yirik yomb sikerek mon rek yinek bap, ḡniḡ solwara namb siḡak diyokek, siyip kun okok mindeyak gok pikpaḡ pikek amek, ḡniḡ solwara ak likaḡ tawek amek, piys tap mindeyak gok maḡgiysek kumyak.

<sup>10</sup> Pen enjol namb kanaḡ ak, biykul nuk ak punḡek, gap poḡglin yomb mon yinimb rek yinek bap, semb biyoḡ nimb punḡjiw ḡniḡ yomb apyowip gok sek, ḡniḡ kilam jiwip gok sek kuḡaynep gi timey gak.

<sup>11</sup> Gap kun ak yimb nuk, “Malasin silik” aḡyak. Biynimb kuḡay yimb nep, ḡniḡ gi timey gak kun gok ḡimbiy kumyak.

<sup>12</sup> Pen enjol tiḡgawip ak, biykul nuk ak punḡek, pumb, takin, gap gok sikum rek pikyiwgiy, melik tep per gip rek ma gak. Pumb ak timey giy, takin gap gok timey giy, melik giyiḡgip rek ma gak.

<sup>13</sup> Pen yand kun giy niḡmindyiḡ niḡnik: yakir duk ak semb namb siḡbiyoḡ wiḡind taḡgyiḡ, minim yomb rek aḡgiy aḡgak, “Ak-ey! Ak-ey! Timey yimb giḡniḡ gisap. Enjol omiḡal nokom,

biy kul kiyk punḡniḡ gispay ak punḡyakniḡ, biy-imb man kumb ar biy mindpay gok kuyip, timey yimb giniḡgamb aḡgak.”

## 9

### *Enjol Mamind Ak Biy kul Nuk Punḡgak*

<sup>1</sup> Enjol mamind ak, biy kul nuk ak punḡgakniḡ, gap semb biyoḡ nimb punḡjiw man kumb biy owak bap nup niḡnik. Pen nup kiy kaw miḡgan kiruḡ ma tikak ak ñeyak,

<sup>2</sup> kawrumb kinjeḡ ak yikek, sikum yomb sik-erek ak araniy, pumb ak sek, takin ak sek gek yiw giy, kisyim owak.

<sup>3</sup> Kun gek, joḡ golbind gok, sikum namb kun okok nimb gi dam man ar biyaḡ ay, tap kanj meḡg yomb gok gipay rek giniḡgeyak.

<sup>4</sup> Gor golbind kun gok kuyip aḡgak, “Minj kas mon kas tap yerip yerip man ar biyaḡ jaknimuḡ gok, gi timey ma ginimimb; biynimb kil yand ak awinbeḡ kuyip biyoḡ ma mindip gok nep, gi timey ginimimb aḡgak.”

<sup>5</sup> Aḡgak kun ak, pisnep pikayem kumiḡniḡgiy aḡgiy ma aḡgak, yikop takin onep mamind ak yiwur ñinimimb aḡgiy aḡgak. Kuyip yiwur ñiniḡgambay kun ak, tap kanj meḡg yomb gok siwey yiwur gip rek giniḡgamb.

<sup>6</sup> Ñin namb kun ak, biynimb kun gok kumbinup aḡgiy niḡniḡgambay ak pen; kumemb kinjeḡram bap ma mindeniḡgamb.

<sup>7</sup> Joḡ golbind kun gok, biynimb kanj hos dand penpen ñaḡniḡ, tap kilis aypay rek gok, ay

mindeyak. Jun kiyk biyon ar band gol diy giyak gok ayak. Jomluk kiyk gok, biynimb rek ayak.

<sup>8</sup> Jun kas kiyk gok, biyn jun kas rek ayak. Pen menḡ kiyk gok, kayn ayndik layon apay ak menḡ rek ayak.

<sup>9</sup> Pambil okok, ayen siyor rek ak ayak. Pen kuḡaynep pil pikeyak, kanj hos gok, korip gumiy sek gok kuḡaynep lipiḡ dand penpen ḡanḡniḡ amey, giygiw anḡip rek gok anḡak.

<sup>10</sup> Sumb day biym, maplonḡim biynimb siwamb yiwur gip rek ak gak. Gor kuyip anḡek, takin onep mamind ak, biynimb gok kuyip yiwur ḡiyiḡ mindeniḡambay.

<sup>11</sup> Tap kun gok kiyḡ kiyk mey, enjol siḡok kaw miḡgan kiruḡ ma tikak ak nimb; Hiybriw minim anḡiy, yimb nuk Abadon apay; pen Griyk minim anḡiy, Apoliyon apay. Minim junj kun ak mey, “Biynimb gi timey yimb gip.”

<sup>12</sup> Kun ak miker yomb nind ak wip; pen omiḡal mindip.

### *Enjol Kanḡol Ak Biykul Nuk Pungak*

<sup>13</sup> Pen enjol kanḡol ak, biykul nuk pungakniḡ niḡnik: minim bap bind ar gol diy giyak bak siḡak nimb,

<sup>14</sup> enjol biykul di mindek ak nup anḡak, “Enjol timey omiḡal omiḡal tiwniḡ ayey, ḡiḡ yomb Yi-wpreytiys gol siḡak mindpay gok, wisik yoknimin anḡak.”

<sup>15</sup> Yenen: Gor enjol kun gok kuyip nind anḡayek, simiy kun ak nep, ḡin kun ak nep, won kun ak nep kond mindyiḡipay ak mey, ḡin

kun ak apek, biynimb mankumb biy kuñaynep ñaŋgningiy anġiy, wisik yokak.

<sup>16</sup> Pen yip anġyak, “Amiybi kuñay yimb nep, tiw handret miyliyon rek tikjakiy, penpen ñaŋgning gispay anġyak.”

<sup>17-18</sup> Pen niñnik: kanj hos kiyk gok sek, bi hos ar bisgiyak gok sek ayin tinġliys ayak gok, gunap mon mañlan likañ rek gak, gunap miymor muk rek gak, gunap kamb walin “salpa” apay ak rek gak. Kanj hos jun gok, kayn layon jun rek ayak. Meñg miñgan kiyk biyon sikum sek, mon mañlan sek, tap salpa yuk timey ak sek apiy gek, biynimb kuñaynep kumyak.

<sup>19</sup> Kanj hos kun gok kilis kiyk ak mindek, jun day bineñ sek, yiniñg day biym sek. Yiniñg kiyk gok, siyñ jun rek ayak ak mey, biynimb gok kuyip gi timey giyak.

<sup>20</sup> Pen biynimb kuñaynep yimb kumey, biynimb mindeyak gok gak kun ak niñiy; yenen tap siy tap timey ġipun anġiy niñiy ma kirgiyak. Pen tap yikop minim ma anġiy, gos ak niñiy, kinjeñ ma tañgiy; kamb, mon, gol, siylpa, biras diy gayak gok anġniñsipun anġiy; kichekiy tap gok kuyip nep anġniñmindeyak.

<sup>21</sup> Pen chip ñaŋgiy, koyimb pikiy, kunj giy, tap siy diy, biyn siy bi siy gey amnakniñ; yenen kun ġipun anġiy ma kirgiyak.

## 10

### *Enjol Ak Jon Nup Buk Ñek Ñiñak*

<sup>1</sup> Pen tip ak niñnik; enjol kalrimey yimb bap semb biyon nimb mis apek. Enjol kun ak nup,

semb kom kom gakniņ, tiybeñ ak jun nup ak pang gaw giy, jomluk nuk ak, pumb rek yiniy, tomb kind nuk ak, mon yiniy maņlaņ gip rek ak gak. Nuk semb biyoņ nimb apiy,

<sup>2</sup> tomb yipund kind ak ñiņg solwara ar ak tawiy, aņind kind ak lum ar ak tawiy, buk sikoy band bap mikal giy dimdiyiņg,

<sup>3</sup> kayn layon minim rek ak aņgek, timuk onep ar ak minim gunap pen aņgyak.

<sup>4</sup> Minim aņgyak kun ak tikayin aņgen, minim bap semb biyoņ nimb aņgak, “Minim kun ak sek ma tikninin aņgak.”

<sup>5</sup> Pen enjol tomb piskind ak ñiņg solwara ar taw mindek, piskind ak lum ar taw mindek niņnik ak, ñin yipund kind ak dand araniy Gor miñmon biyoņ yomiy aņgak,

<sup>6</sup> “Yesek ma apiyn. Biyomb perper mindeniņgamb ak; mankumb, solwara, semb biyoņ maņgiysek gayak rek, yimb nup diy niņind yimb aspiyn. Miñiy tapin mindiy mer;

<sup>7</sup> won biy nep enjol ar ak, biy kul nuk pungakniņ, Gor giņiņgayn aņgak rek giņiņgamb. Biynimb gok minim kun ak ma niņyiņgipay ak pen; nuk bi minim nup aņgep gok kuyip gos ñek, aņgeyak niņnuk rek, miñiy maņ asaw: pisnep miser giņiņgamb aņgak.”

<sup>8</sup> Pen minim bap semb biyoņ nimb yip tip ak aņgiy aņgak, “Enjol tomb piskind ak solwara ar taw mindip, piskind ak man ar taw mindip anup am aņgey, buk sikoy mikal giy di mindip ak, nip ñinimuņ aņgak.”

<sup>9</sup> Kun aņgek, enjol mindek ak amiy, yip buk

sikoy kayan ak ñan angen, yip ñiyiᅅg aᅅgak, “Diy ñiᅅan. Ñimbey, meᅅg miᅅgan nip ak bum ñiᅅg yindik gip rek giniᅅgamb ak pen, koᅅgiy namb biyaᅅ amiy, timey giniᅅgamb aᅅgak.”

<sup>10</sup> Aᅅgek, buk minim kun ak diy ñimben, bum ñiᅅg yindik rek gak ak pen; ñimb namb biyaᅅ ayen, timey gak.

<sup>11</sup> Pen yip aᅅgyak, “Biynimb miᅅmon keykey, wak keykey, minim yimb keykey kiyaᅅ kiyaᅅ gok sek, kisen kuyip yerer giniᅅgamb ak, minim gu-nap sek aᅅgᅅniᅅgamban aᅅgyak.”

## 11

### *Bi Gor Minim Aᅅᅅᅅemb Omiᅅal Ak*

<sup>1</sup> Pen yip kur par tap ayniᅅbay bap ñiyiᅅg aᅅgyak, “Am Gor aᅅgᅅniᅅep korip ak ayniᅅiy, Gor nup tap simboᅅgipay bind ar ak ayniᅅiy ginimin. Biynimb Gor aᅅgᅅniᅅep korip miᅅgan apiy nup aᅅgᅅniᅅsipay gok kunep, ñin paᅅg niᅅnimin.

<sup>2</sup> Pen biynimb Jiwda mer gok, per ap wariy mis akyaᅅ mindpay rek, tip kun ak sek ma ayniᅅnimin. Yenen: kiyaᅅ nep dawin yomb suᅅ-tep Jerusalem timey giyaᅅg mindey mindey, ñin wan tawsin tiw handret sikistiy amniᅅgamb.

<sup>3</sup> Yand pen, bi minim yip aᅅᅅᅅemb omiᅅal aᅅgyoken, yikop bek band rek gok yimyaᅅg, minim yip aᅅᅅᅅi taᅅger, ñin wan tawsin tiw handret sikistiy kun ak amniᅅgamb aᅅgak.”

<sup>4</sup> Bi minim nup aᅅᅅᅅemb omiᅅal kun ak, mon oliyp bind omiᅅal rek ak pen, lam omiᅅal rek. Kiymiᅅay Biyomb mankuᅅb biy kond mindip ak nup woᅅg giᅅniᅅgambiyr.

<sup>5</sup> Pen biynimb gunap kuyipmiñay timey giniñg gey, mon mañlan meñg miñgan kiyk ak nimb apiy, kuyip yinek kumniñgambay. Kuyipmiñay nembnemb geniñgambay, kun ak rek nep giniñgamb.

<sup>6</sup> Gor kuyipmiñay aňgayek woñg nup gi dand amyiñg, miñmon ma pikañ aňger, ma pikniñgamb; ñiñg gok likañ tikañ aňger, likañ tikniñgamb; biynimb gok kuyip miker yerip yerip gok gañ aňger, giniñgamb.

<sup>7</sup> Pen Gor minim ak aňgñi dand amiy, day jiwriknij, tap ayndik kaw kiruñ ma tikak biyañ nimb winiñgamb ak, kiymiñay yip penpen gi dand amiy, pisnep ñaňgayek kumniñgayr.

<sup>8</sup> Chip par omiñal kun ak mindeniñgayr miñmon dawin yomb lor namb siñak. Dawin kun ak mey, Biyomb ak nup mon kiros bak biyoñ ñaňgbirikayak. Biynimb miñmon kun ak, Sodom yip, Yijip yip mindrep ma giyiñgipay rek ak mindpay.

<sup>9</sup> Pen biynimb miñmon okok keykey mindpay rek, minim keykey apay rek, wak keykey ayak rek, kuyipmiñay yiruk niñniñgambay rek, chip omiñal kun ak ma dam komnimimb aňgey; kumniñgayr ñin day ak tikiy, ñin omiñal nokom sek ñaňgayniñgambay tip siñak nep mindeniñgayr.

<sup>10</sup> Bi Gor minim aňgñemb omiñal kun ak, biynimb man ar biy ker gok kuyip, miker yomb ñiyiñgpiyr rek, pen panj aňgiy, tap yomb ñimbyiñg, kamep aňgyiñg, tap pen ñek pen ñek gi mindeniñgambay.

<sup>11</sup> Pen ñin day ak sek, ñin ominjal nokom sek mindiy, Gor añin band ak yokek namb kuyip biyan amek tikjakrik. Kun gek ninjiy, biynimb gok kuyip jel gak.

<sup>12</sup> Pen minim bap, semb biyon nimb kuyipminay wiyr angyi, suk angek mey, biynimb ñan gep kiykminay gok ninmindyakniñ, Gor miñmon biyon amer, semb ak kuyip yiwgak.

<sup>13</sup> Pen won kun sinjak nep monmon yomb sikerek ak diy, dawin yomb ak day onep anjip ak mindakniñ, day onep wanjrem ak pikjispuk giy, biynimb sepen tawsin pikayak. Pen biynimb mindeyak gok, tap gak kun ak ninjiy pirikiy, Gor Biyomb semb biyon ak nup yimb dand aranyak.

<sup>14</sup> Pen ninim! Miker yomb nind ak gak, namb ak gip, miñiy kisen ak gining gisap.

### *Enjol Ar Ak Biykul Nuk Pungak*

<sup>15</sup> Won kun sinjak nep enjol ar ak, biykul nuk ak pungakniñ, minim bap semb biyon nimb angyi angak, “Miñiy tikiy biyomb gunap key mer: Biyomb chin ak sek, Kiyñ yomb key yimb nuk ak sek kiyñ mindiy, miñmon okok mangiyse perper kond mindeningayr angak.”

<sup>16</sup> Pen biyomb ñin jiwiy andikiy nokom siya kiyñ ar kiyk ak bisin mindeyak gok, kongim yimiy jiy kuyangiy, Gor nup angninying angyak:

<sup>17</sup> “Gor. Nand Biyomb key yimb!

Nind mindyngipan, miñiy mindnep mindpan!  
Biyomb yimb per mindpan rek, miñiy tikiy biynimb miñmon okok  
mangiyse kond mindpan ak mey, nip tep yimb  
aspun!



18 Biynimb miñmon okok nimb nip ninjy kaljiw mindyinjipay.

Pen miñiy kuyip yiwur ñiningamban ñin ak wip. Biynimb kumyak gok kuyip, kor gep ñin ak wip ak mey; kuyip kor

giy, biynimb nip direp gipay gok, minim nip anjep gok, suñ-tep

mindpay gok, nip ninjy ñawil dipay gok, yimb sek mindpay akan,

tam okok mindpay gok manjiysek direp giningamban.

Pen biynimb monmon giy, biynimb gunap kuyip ñang pikaypay gok kuyip, pen kunep timey giningamban angyak.”

19 Kun angyakniñ, Gor angnijep korip semb biyon ak miñgan yikiy, Gor minim mindek kes won ak misen gek niñnik. Won kun ak nep timuk añiñak diy, giw yomb sikerek ak anjiy, miñmon niñgomb manjiy gok pikiy, monmon apiy gak.

## 12

### *Biyn Ak Sek Ñom Nim Ak Sek*

<sup>1</sup> Tap key kindiknimb yomb bap, semb namb sinjiyon gek niñnik. Biyn bap pumb melik rek giy, takin ak tawbirikiy, gap onep wimiñgan ak, kiwiyn aypay ar band nuk ar biyon ayek mindek.

<sup>2</sup> Pen nuk ñapan tikniñg, ñapan ñiñakniñ wuñg pikak.

<sup>3</sup> Tap key kindiknimb bap sek, semb namb sinjiyon misen gek niñnik. Ñom nim likañ sek, yomb sikerek ak mindek. Jun nuk onep ar ak ay,

kom nuk onep wanjrem ak ay, kiyn aypay ar band gok, jun ar keykey ay mindek.

<sup>4</sup> Ñom nim kun ak, yiniñg nuk ak gap semb biyoñ gok pikek, kuñaynep puñgjiw lum biy yowyak. Kun ak gap mañgiysek ñin pañg ay, day omiñal mindakniñ, day bap rek puñgjiw yowak. Pen nuk biyn ñapan tikniñg gek ak, tikek ñiniyn añgiy, ap kond nep mindek.

<sup>5</sup> Pen biyn kun ak Ñinuk ayin kur par ak diy, biynimb miñmon okok mañgiysek kond mindeniñgamb ak nup tikayek, Gor Ñinuk kun ak piliñg diy, dand siya kiyn nuk mindip ar biyoñ amnak.

<sup>6</sup> Gor biyn kun anup tip bap gayek, pirik kun okok amiy, kun okok nep mindakniñ, Gor nup tap keñmañgiy ñiying kond mindeniñgamb, ñin wan tawsin tiw handret sikistiy amniñgamb.

<sup>7</sup> Pen enjol yomb Maykol enjol nuk gok diy, ñom nim ak kichekiy malñiluk nuk gok diy penpen gi dand amiy mey,

<sup>8-9</sup> ñom nim ak kichekiy malñiluk nuk gok sek, semb biyoñ nimb ñañgjiw yokey pisnep lum biy wiyak. Ñom nim kun ak mey, Seytan nep. Nuk nep biynimb miñmon okok kuyip tom gek, minim nup ak niñyak.

<sup>10</sup> Pen minim yomb bap, semb biyoñ nimb añgiy aňgak:

“Kiyn yomb key yimb Gor chinup yokip anep, biynimb gok kuyip kim dip. Nuk nep Kiyn yomb mindip ak mey, mam ay chinup gok kuyip pumbnamb kisyimken

aᅅgiw mindyᅅgip anup, mankumb biyaᅅ  
diyokak.

11 Pen biynimb Kiyᅅ yomb key yimb anup  
chiᅅgyak gok, Siypsiyp Ñiluk likaᅅ ak gek,  
biynimb nuk mindpun aᅅgiy, ma pirikyak;  
chinup ᅅaᅅgᅅniᅅ ᅅaᅅgᅅniᅅgiy aᅅgiy, Kiyᅅ  
yomb key yimb anup chiᅅgiy nep mindey  
mey; Seytan kuyip gek, apyap pikniᅅgiy rek  
ma ayak.

12 Kun ak nimb biynimb semb biyᅅᅅ mind-  
pim gok, tep gakniᅅ mindenimimb. Pen  
mankumb ak sek, solwara ak sek simb  
niᅅep. Yenen: Seytan nup mindpim kun  
biyaᅅ diyokek, ᅅin nuk kuᅅay ma mindip  
rek, kaljiwiy nimbip gi timey giniᅅgamb  
aᅅgak.”

13 Pen ᅅom nim kun ak, yip man ar biy diyokpay  
aᅅgiy gos ak niᅅiy, biyn Ñi tikak ak nup wur sek  
yukniᅅgek,

14 Gor nup yakir duk pilkind rek yomb omiᅅal  
ay ᅅek, wiᅅind miᅅmon nep namb okok amnak.  
Am kun okok mindakniᅅ, nup kond mindek, ᅅin  
wan tawsin tiw handret sikistiy amniᅅgamb.

15 Pen ᅅom nim yomb ak, ᅅiᅅᅅ wilik rek  
wokyoken, biyn kun ak nup woᅅind amnaᅅ aᅅgiy,  
wokak ak pen,

16 Gor gek ᅅiᅅᅅ kun ak man miᅅgan okok paᅅᅅ  
amiy, kur kur gek amnak.

17 Kun gek, ᅅom nim ak milukrimey yimb  
yapek, biyn kun ak ᅅapan tikayep nuk gok, Jiysis  
nup chiᅅgiy, Gor minim kindik giy gipay gok yip  
penpen giniᅅᅅ,



<sup>6</sup> Nuk kun giy Gor nup aᅅgiwiy, miñmon nup mindip biyoᅅ aᅅgiwiy, biynimb nuk yip mindpay gok kuyip aᅅgiwiy gak.

<sup>7</sup> Pen Gor nup ñinen kirgek, biynimb tep nuk gok yip penpen giy, ñaᅅgiwyokiy, biynimb okok maᅅiysek: miñmon keykey, kiñiᅅ keykey, minim yimb keykey, wak keykey ayak rek kuyip kond mindek.

<sup>8</sup> Biynimb maᅅiysek rek, tap ayndik kun anup lotiw giniᅅgambay. Pen biynimb siᅅok: miñmon ma alwol gayak ñin ak, Gor per mindeniᅅgambay aᅅgiy, yimb kuyip Siypsiyp Ñiluk kumak buk yomb nup biyaᅅ tikayak gok nep, tap ayndik kun ak nup, lotiw ma giniᅅgambay.

<sup>9</sup> Biynimb gos timund sek mindenimimb gok, Gor minim aᅅgip kun biy niᅅnimimb!

<sup>10</sup> Biynimb Gor kalambis amniᅅgiy aᅅgiy niᅅimb gok, kalambis amniᅅgambay. Biynimb baynat diy piᅅiyey kumniᅅgiy aᅅgiy niᅅimb gok, baynat diy piᅅiyey kumniᅅgambay. Kun giniᅅgamb rek, Gor biynimb nuk gok ma apyap pikjun aᅅgiy, nup gosimb niᅅyiᅅg, chingrep giy mindyiᅅg mey, ma apyap pikniᅅgambay.

### *Tap Ayndik Bap Pen Lum Namb Akyan Nimb Arachakak*

<sup>11</sup> Pen tip ak niᅅiy niᅅnik: tap ayndik rek bap sek, man namb akyan nimb arachakak. Kom nuk omiᅅal ak, siypsiyp ñiluk kom rek ayak ak pen; minim nuk ak, ñom nim rek aᅅgak.

<sup>12</sup> Nuk tap ayndik nindnimb anup wong giñiyiᅅg, biynimb miñmon okok maᅅiysek nem-bnemb gek, tap ayndik nindnimb baynat piᅅiyey

mey kumak ak pen, tip mindek kun anup, lotiw rek giyak.

<sup>13</sup> Tap ayndik nindnimb ak, tap ayndik kisenimb ak nup bak ayakniņ, tap mageprek kuņaynep gak. Biynimb niņmindyakniņ, nuk gek, mon maņlaņ ak semb biyoņ nimb man biy wak.

<sup>14</sup> Biynimb mankumb biy nimb gok niņmindyakniņ, kuyip yesek tom giyn aņgiy, tap mageprek kun gok gek, niņind nep aņgip aņgiy niņyak. Pen bi kun ak, biynimb mankumb biy kuyip maņgiysek aņgak, “Tap ayndik baynat piņiyey mey kumak ak pen, tip mindip ak nup yimb dand araniņg,” tap nup rek bap gaynimimb aņgek,” tap kun ak rek bap gayak.

<sup>15</sup> Pen Gor tap ayndik ak nup ñinen kirgek, tap gayak kun ak nup, aņiņ band ak puņgek amek, kim mindiy, minim aņgiy aņgak, “Yand biyomb. Yip nep lotiw ginimimb aņgak.” Kun aņgek, biynimb nup ma lotiw giyak gok, maņgiysek aņgek ñaņgdiyak.

<sup>16</sup> Nuk biynimb yimb mindek gok, yimb ma mindek gok; maniy kuņay mindek gok, maniy ma mindek gok; kalambis wong giyak gok, yikop mindeyak gok kuyip maņgiysek, yand nimbip kond mindpiyn rek, kil yip ak dinimimb aņgek, maņgiysek rek kil nup ak diyak. Gunap kil nuk kun ak ñin yipund kind ak diyak, gunap awinbeņ biyoņ diyak.

<sup>17</sup> Pen biynimb kil nup kun ak ma diyak gok, tap tawniņg akan, sikiyim giniņg, giniņgiy rek ma ayak. Kil kun ak mey, yimb akan namba nuk ak.

<sup>18</sup> Biynimb gos tep niņbay gok, minim junj

kun ak, piyow niñningiy rek mindip. Niñrep giy mey; tap ayndik rek kun ak, namba nuk junj ak niñningambay. Namba kun ak, bi bap yimb nuk ak mindip. Namba kun ak mey 666.

## 14

### *Biynimb Kunjaynep Kamep Kisenimb Bap Angyak*

<sup>1</sup> Pen tip ak niñiy niñnik: Siypsiyp Ñiluk ak Sayon dum biyoñ jakiy mindakniñ, biynimb wan handret powtiy pow tawsin gok nuk yip mindeyak. Biynimb nuk yip mindeyak kun gok, awinbenj kiyk biyoñ mañgiysek yimb nuk ak sek, Nop yimb ak sek tikayey mindek.

<sup>2</sup> Pen minim bap, semb biyoñ nimb ñiñg sinj yomb piñiy giw anğip rek akan, timuk giw parsek anğip rek ak anğek niñnik. Minim tep kun ak, giyta pikambay anğip rek ak anğak.

<sup>3</sup> Pen tap pilkind onep kañgol ayak gok sek, bi minim tuñgasikep gok sek siya kiyn nup ak piñiy kus gi mindyakniñ, biynimb wan handret powtiy pow tawsin gok kuyip di namb ay, kamep angyak. Kamep kun ak kisenimb; biynimb lum ar biy nimb yikop gok niñningiy rek ma ayak; biynimb wan handret powtiy pow tawsin Gor dak kun gok nep niñningiy rek ayak.

<sup>4</sup> Biynimb kun gok mey, mind tep giy suñ nep mindiy, Siypsiyp Ñiluk ak yip nep tapay. Krays kuyip biynimb yikop namb okok nimb diy, dand Nop ker awak rek, kiyk tap marip kisenimb gunap pipañ dapiy, Gor apiymiñay kuyip simbong ñey, dipiyr rek ak mindpay.

<sup>5</sup> Gor minim niñind nuk ak kisen gun anğiy; suñ-tep mindpay.

*Enjol Omiñal Nokom Minim Anğñiyak*

<sup>6</sup> Pen tip ak niñiy niñnik: enjol bap semb namb siñbiyoñ wiñind tangying, Gor minim tep per mindeniñgamb ak, biynimb man ar biy, wak keykey ayak rek, minim yimb keykey apay rek, miñmon keykey mindpay rek,

<sup>7</sup> kuyip suk yomb anğiy anğak, “Kor yomb giniñgamb ñin ak wip rek, Gor nup jel pirikiy, nuk Biyomb semb biyoñ, man biy, ñiñg solwara, ñiñg key pañgakip gok mañgiysek gayak anğiy, yimb nup ak dand aranimimb anğak.”

<sup>8</sup> Enjol bap, enjol nind ak nup kisen giying anğak, “Gor gek miñmon yomb Babiylon pisnep apyap pikip-ow! Binuk dinimuñ ak mindakniñ, bi yesek gok siy di mindip. Pen ñiñg wayn kilis nuk ñiñimb ak, biynimb miñmon keykey gok kuyip ñek ñimbey, nuk gip rek, sakiy giy nep gipay anğak.”

<sup>9</sup> Enjol bap pen, enjol nind omiñal ak kuyip kisen giy, suk yomb angyiñg anğak, “Biyimb tap ayndik anup lotiw giying, tap nup rek niñiy gayak ak nup lotiw giying, kil nup ak awinben biyoñ akan, ñin ar siñak diniñgambay gok,

<sup>10</sup> Gor nup miluk yimb yapek, ñiñg wayn silik yimb ak, kap kuyip biyañ pañgek aranjakek, ñek ñiñiñgambay. Siypsiyp Ñiluk ak sek, enjol suñ-tep nuk gok sek niñmindyakniñ, kuyip anğ mon key yinçap ak yokek, mon mañlañ salpa sek ak kuyip yinakniñ wuñg pikmindeniñgambay.



<sup>11</sup> Mon sikum kun ak, perper nep araningamb. Kun ak, biynimb tap ayndik ak nup lotiw giying, tap nup rek ninjy gayak ak nup lotiw giying, kil nup diningambay gok, Gor kuyip pen, yiwur yomb ak pumbnamb kisyimken ñiningamb angak.”

<sup>12</sup> Kun ak, chin biynimb Gor angip rek giying, Jiysis nup gosimb ninbun gok, Gor apiyminay kuyip chingrep giy gon amnimuñ.

<sup>13</sup> Pen minim bap, semb biyoñ nimb yip angak, “Minim angning gispiyn biy tikaynimin. Miñiy miker gip ñin biy, biynimb Gor nup chingiy kumningambay gok kuyip, tep yimb giningamb angak.” Angek, Gor Kawnan ak angak, “Niñind yimb. Kiyk miker diying wong kosyam gipay rek, Gor niñimb ak mey, nuk angek am nuk yip añiñ ay, miñmiñ giying mindeningambay angak.”

### *Tap Wong Man Ar Biy Wos Gip*

<sup>14</sup> Pen niñnik: Bi bap Ñinuk rek ak, semb tund band ar ak bising mindek. Jun nuk biyoñ, bi kiyn aypay ar band ak ay, ñayip gongemb kindrimey wiyt mañgiy tik dand opay rek bap di mindek.

<sup>15</sup> Pen enjol bap, Gor angniñep korip miñgan biyañ nimb apiy, bi semb namb siñak bising mindek anup, suk yomb angiy angak, “Lum ar biyañ wiyt mañgiy gok mañgiysek pik gip. Wiyt tik dand owep ñin ak wip rek, ñayip nand kun ak diy, tiknimin angak.”

<sup>16</sup> Angek, bi semb namb siñak bising mindek ak, ñayip nuk ak diy, wiyt mañgiy lum ar jakak gok mañgiysek tikak.

17 Enjol bap pen, ñayip gongemb bap diy, Gor angninēp korip miŋgan semb biyoŋ nimb mis owak.

18 Won kun ak nep, enjol mon maŋlaŋ kond mindyīŋip ak, Gor nup tap simboŋgep bind ar ak nimb apiy, enjol bap nup suk yomb aŋgiy aŋgak, “Wayn maŋgiy lum ar biyaŋ nimb gok pik gip rek, maŋgiysek tik dap nan-ginimin aŋgak.”

19 Kun aŋgek, enjol kun ak, ñayip gongemb nuk ak diy, wayn maŋgiy gok tikdam, Gor nup miluk yapek, wayn maŋgiy tawsimbjakip kiwok miŋgan ak yokak.

20 Miŋgan kun ak yokek tawsimbjakakniŋ, likañ ak tan aranjakiy, ñiŋg wilik yomb apyowip rek wiw aŋg apyapyiŋg, chiriy handret tiwendiy (320) kiylowmiyta rek amnak.

## 15

### *Enjol Gok Geniŋgambay Miker Yomb Keykey Onep Ar Ak Giniŋgamb*

1 Pen tap key kindiknimb niŋjy wal aŋgep rek bap sek, semb namb siŋbiyoŋ gek niŋnik. Gor nup miluk yimb yapek, miker onep ar ak gek, pisnep day jiwniŋgamb aŋgiy, enjol nuk onep ar ak kuyip aŋgayek, miker yomb kun gok, dand lum biy wiŋiŋg geyak.

2 Pen kiñiŋ kun siŋak niŋnik: ñiŋg chemb bap rek, mon maŋlaŋ sek yiŋgong giy, galas rek kind yimb aŋgiy mindek. Biynimb tap ayndik ak sek, tap nup rek gayak ak sek, yimb nup namba ak sek asikrep giy, minim nup taw achip giyak gok; gol kun siŋak mindeyak. Gor kuyip giyta keykey ñek;

<sup>3</sup> bi Mosis Gor nup wonḡ giñiyiḡip minim ak sek, Siypsiyp Ñiluk minim ak sek anḡyiḡ, kamep anḡiy anḡyak:

“Gor. Nand Biyomb key yimb. Wonḡ nand ma ginimin rek bap ma mindip; yerer giniḡ giniḡamban.

Nand Biyomb miñmon okok maḡiysek kond mindpan ak mey, yipund giy ar ak nep gipan.

<sup>4</sup> Biynimb maḡiysek nip niḡiy, ñawil diniḡambay.

Nip Biyomb anḡiy, yimb dand araniḡambay.

Nand miñ yipund giy ar ak nep gipan ak niḡiy, miñmon okok maḡiysek ap nip anḡniḡniḡambay anḡyak.”

<sup>5</sup> Kisen pen niḡnik: Gor anḡniḡep korip semb ar biyon ak miḡan yikiy, Gor ser korip ak misen mindek.

<sup>6</sup> Enjol onep ar ak, biynimb man ar biy gok kuyip, miker yomb ñiniḡ, Gor anḡniḡep korip miḡan biyan nimb mis wiyak. Enjol kun gok, chech tund tep ñiñakol gak gok nep aydiy, ler kamb gol diy giyak gok, kond namb ak aybirikiy owyak.

<sup>7</sup> Tap pilkind onep kaḡol ayak gok, bap ap enjol onep ar ak kuyip, diys keykey ñak. Diys miḡan kun gok, Biyomb perper mindeniḡamb ak, biynimb mindrep ma gey miluk niḡimb minim yomb ak arachakiy mindek.

<sup>8</sup> Gor Biyomb jel gip ak mey, minim yomb nuk kun ak mindakniḡ, anḡniḡep korip miḡan ak sikum arachakiy mindek; biynimb bap miḡan

kun ak, amningiy rek ma ayak. Enjol onep ar ak, miker yomb biynimb ñining geyak gok ñidiy nep, korip miñgan kun ak amningiy rek ayak.

## 16

### *Enjol Miker Yomb Onep Ar Ak Dand Wiyak*

<sup>1</sup> Pen day niñiy niñnik: minim bap Gor aņgnipep korip miñgan biyañ nimb enjol onep ar ak kuyip, suk yomb aņgiy aņgak, “Biynimb timey gipay rek Gor miluk yapek, kuyip miker ñining, diys onep ar tumb biyoñ aranjakiy mindip gok, dam lum ar biyañ songem amnañ aņgak.”

<sup>2</sup> Kun aņgek, enjol nind ak diys nuk dam lum ar biyañ songek, biynimb tap ayndik kil nup ak diy, tap nup rek gayeyak lotiw giyak gok, kuyip soy ayndik yiwur yomb sikerek gak gok ayak.

<sup>3</sup> Enjol namb ak, diys nuk dam ñiņg solwara ar ak songek, ñiņg solwara ak, biynimb ñaņgey likañ wip rek ak ay, tap ñiņg solwara namb kun okok mindeyak gok, maņgiysek kumdiyak.

<sup>4</sup> Enjol namb kaner ak, diys nuk dam ñiņg kilam jiwip gok sek, yikop apyowip ar gok sek songek, ñiņg gok maņgiysek likañ ayak.

<sup>5</sup> Pen enjol ñiņg maņgiysek kond mindip ak aņgak, “Gor. Nand kuyip niñind yimb kun gipan. Nand Bi suñ-tep yimb. Nind yimb yimb mindiy, mind dand apiy, mindnep mindpan.

<sup>6</sup> Biynimb kun gok nep mey, biynimb nip ker gok kuyip pikay, bi minim nip aņgep gok kuyip, ñaņgayey likañ yowak ak mey, kuyip pen kunep likañ ñey ñimbsipay ak, giy dispay aņgak.”

<sup>7</sup> Kun angek, minim bap Gor nup simbonjep bind ar ak nimb angak, “Gor. Nand Biyomb yimb; biynimb tap okok mangiysek kond mindpan. Biynimb gok kuyip yiwur ñimban ak, gipay rek ninjy, pen kunep gipan angak.”

<sup>8</sup> Enjol tingawip ak, diys nuk dam pumb anup songek, biynimb gok kuyip sinjrimy yimb ninjimon rek ayak.

<sup>9</sup> Sinjrimy yimb ninjy, kuyip tapin yinak ak pen; yenen timey gipun angy mindrep giy, yimb nup ak ma dand araniyak. Chinup miker ñisap angy, nup angyiyak.

<sup>10-11</sup> Enjol mamind ak, diys nuk dam tap ayndik siya kiyn mindek ar sinak songek, biynimb nuk kond mindyngip namb ak, kisyim yiwing dak. Soy ayndik ay, yiwur yomb gek, alemb siwbiriyak ak pen; timey giyak ar ak ma kirgiyak; giyng nep mindiy, Gor semb biyon nup angyiyak.

<sup>12</sup> Enjol kangol ak, bi kiyn yomb miñmon pumb limgip okok nimb ap, Siypsiyp Ñiluk ak yip penpen giningambay ñin ak wip rek, ap penpen giningiy angy, diys nuk ak dam ñing yomb Yiwpreytiys songek, ñing kun ak pisnep milip gak.

<sup>13</sup> Kun gakniñ, malñiluk as rek ayak ominal nokom ninjik. Bap ñom nim menj miñgan ak nimb aranjakak; bap tap ayndik menj miñgan ak nimb aranjakak; bap bi Gor minim aspiyn angy, yesek nep angningamb ak menj miñgan biyan nimb aranjakak.

<sup>14</sup> Malñiluk kun gok, Seytan ñapan nuk yimb ak mey, tap mageprek gok giningiy rek ayak. Gor ñin

yomb nuk ak, giniᅅgamb rek niᅅiy niᅅnik; kiyk am kiyᅅ miᅅmon keykey mindpay rek amiy, kuyip poᅅind apiy, Gor bi tap okok maᅅgiysek alwol gayak ak yip penpen gey amnak.

15 “Niᅅrep ginimimb! Yand winiᅅg, bi tap siydep gok ma niᅅmindpay won ak, opay rek ak winiᅅgayn! Kun ak mey, biynimb wisin ma kiniy, chech ayrep giy mindeniᅅgambay gok kuyip, nambiᅅ ma giniᅅgamb; kuyip den miᅅmiᅅ giniᅅgambay!”

16 Pen malᅅiluk kun gok, bi kiyᅅ miᅅmon keykey gok kuyip, dap nan-giniᅅgambay miᅅmon ak, Hiy-briw minim aᅅgiy Amagedon apay.

17 Enjol ar ak, diys nuk ak soᅅgak namb nep ar bikyoᅅ. Soᅅgek, minim bap siya kiyᅅ Gor aᅅgniᅅep korip miᅅgan biyaᅅ nimb suk yomb aᅅgiy aᅅgak, “Miker yomb gok day jiwip aᅅgak.”

18 Kun aᅅgakniᅅ, timuk aᅅgiy giw aᅅgek amnakniᅅ, aᅅiᅅak diyiᅅg kasin maᅅgiy bol gok yap pikiy, monmon yomb sikerek biynimb mankumb biy, nind ma niᅅyiᅅgipay rek bap awak.

19 Monmon yomb sikerek kun ak diy, dawin yomb Babiylon ak biw aᅅgiy, asik taw omiᅅal nokom ay, dawin yomb miᅅmon keykey okok maᅅgiysek, korip tap gok puᅅgiw kosiy masiy gak. Gak kun ak, Gor nup miluk yimb yapek, Babiylon biynimb giyak ak sakiy ma giy, kuyip ᅅiᅅg silik kap tumb biyoᅅ aranjakak ak, ᅅek ᅅiᅅyak.

20 Pen miᅅmon sikoy ᅅiᅅg timb kus gak gok sek, miᅅmon yirik gok sek pisnep kurgak.

21 Miker yomb yimb ak mey, dikiy ningomb mangiy yomb sikerek gok semb biyoŋ nimb yapiy, biynimb gok kuyip sinjrimey yimb pikak. Kuyip sinjrimey yimb pikek niŋiy, Gor nup pisnep anjjiwyak.

## 17

### *Kinjenram Biyn Yomb Rek Bap Yiwur Yomb Diniŋgamb*

<sup>1</sup> Enjol onep ar miker keykey dand wiyak gok, bap ap yip angak, “Biy apey, nip yomen niŋan! Biynimb gok kuŋaynep ñiŋg rek mindey, kinjenram biyn rek bap, ñiŋg kas ar kun ak mindip. Pen Gor nup yiwur yomb ñiniŋgamb rek, nip yomiyn.

<sup>2</sup> Bi kiyy miñmon keykey mindpay rek, kinjenram biyn kun ak yip giranŋyiy, biynimb lum ar biy yikop gok kunep, ñiŋg wayn timey nuk ñimb ak ñimbey, kuyip sakiy ayip angak.”

<sup>3</sup> Pen Gor Kawnan ak yip goŋ ayakniŋ, enjol ak yip dand miñmon nep namb okok amek niŋnik: biyn bap, tap ayndik likañ bap ar biyoŋ biŋiŋ mindek. Tap ayndik kun ak, mumbwak nuk okok, yimb Gor nup anjjiwep gok, kuŋay yimb nep tikayey mindek. Jun nuk onep ar ak ay, molond onep wanjrem ak ay gak.

<sup>4</sup> Pen biyn rek niŋnik kun ak; chech likañ biyn yomb aypay rek ay, gol gunap, biys teprep maniy yomb tawpay gunap mumbwak nuk okok mangiysek ayak. Kap gol diy giyak bap di mindek. Kap miŋgan kun biyan, tap gach tap timey nuk gak gok aranjakiy mindek.

5 Awinben nup biyon, minim weygiy mindyngip bap tikiy angyak, “Dawin yomb yimb Babiylon biynimb bi yesek gok yip girapay gok, biynimb timey yimb gipay gok, nonim kiyk yimb angyak.”

6 Pen niñnik: biyn kun ak, biynimb Gor nup direp giyak gok pikay, biynimb Jiysis nup gosimb niñiy misen angyak gok kuyip pikay gi dand amiy, pisnep sakiy ayak. Gak kun ak niñiy, jiwdiy gos par aynik.

7 Pen enjol ak yip angak, “Yenen jiwdiy gos par aysipan? Tap ayndik jun onep ar ay, molond onep wanjrem ay gip ak sek, kinjenram biyn tap ayndik ar biyon bisgiy, nup dand tangip ak sek minim kiñiñ ak, nip angnining gspiyn.

8 Tap ayndik niñamban kun ak, nind mindyngip; miñiy ma mindip; pen mañ mindip; nuk kaw miñgan kiruñ ma tikak biyañ nimb apek, Gor gek pisnep kurginingamb. Gor miñmon ma alwol gayak ñin ak, biynimb lum ar biy diniñgayn angyi niñak gok, yimb tikayak buk nuk biyañ. Pen biynimb yimb kuyip ma tikayak gok, tap ayndik kun ak tip mindek niñiy, wal yimb angningambay. Yenen, nuk nind mindyngip, miñiy ma mindip ak pen, kisen tip ak mindeningamb.

9 “Minim kun gok niñrep giy nep mey, niñbay. Tap ayndik jun nuk onep ar bineñ mindamb niñambur ak, minim kiñiñ ar omiñal mindip. Bap yirik keykey onep ar ak; bap kiñ keykey onep ar ak. Yirik kun gok, yirik siñok, kinjenram biyn ben nup okok mindpay gok apiyn.

10 Kiyñ kamb kun ak, onep mamind ak nind



kiyŋ mindiy apyap pikdeyak, miñiy kaŋgol ak kiyŋ mindip. Nuk apyap pikeningamb, kiyŋ ar ak pen tip nup ak diy, sikoy won bap nep, biynimb gok kuyip kond mindeningamb.

<sup>11</sup> Pen tap ayndik, nind mindyŋgip ak miñiy ma mindip rek, nuk key kiyŋ jiy binen mindip. Nuk mey, kiyŋ onep ar ak nimb bap. Nuk kiyŋ mindeningamb ñin ak, Gor gek pisnep apyap pikningamb.

<sup>12</sup> Pen molond onep wanjrem niŋamban gok, kiyŋ onep wanjrem biyoŋ. Kiyk miñiy ma mindipay ak pen, kisen Gor gek kiyk biyomb kiyŋ mindiy, tap ayndik ak yip wong giyŋg, biynimb gok kond mindeningambay.

<sup>13</sup> Yenen kiyk gos ar nokom niŋiy, tap ayndik ak nup aŋgey, tip kuyip ak diy, biynimb gok kuyip won bap nep kond mindeningamb.

<sup>14</sup> Kiyŋ kun gok, Siypsiyp Ñiluk ak yip penpen giningambay ak pen, nuk kiyŋ gok maŋgiysek, biyomb gok maŋgiysek kiyŋ yomb kiyk mindip rek; nup ñaŋg pikayniŋiy rek ma ayniŋgamb. Biynimb nuk key niŋiy suk aŋgiy dip gok, nup chiŋgiy nep mindeningambay rek, nuk yip kiyŋ yikop kun gok kuyip wiyniym giningambay.”

<sup>15</sup> Pen enjol kun ak yip aŋgak, “Ñiŋg siŋok kinjenram biyn biŋg mindamb niŋamban ar ak mey, biynimb wak keykey ay, minim yimb keykey aŋgiy, miñmon keykey mindipay rek ak niŋban.

<sup>16</sup> Molond onep wanjrem niŋamban gok sek, tap ayndik ak sek kinjenram biyn ak nup miluk yimb niŋiy, tap nup gok maŋgiysek piliŋ deniŋgambay

mey, daynep mindeningamb. Pen mumbwak nup ak ñimbiy, day day mindeningamb gok, danjiyey yinsimbok amningamb.

<sup>17</sup> Yenen: Gor kuyip gos ñek, gos ar nokom niñiy, tap ayndik ak nup angey, tip kuyip ak diy gek amek mey, Gor giningamb angyi angayak rek nep giningamb.

<sup>18</sup> Pen kinjenram biyn niñamban kun ak, nuk mey dawin yomb yimb rek. Nuk minim angek, kiyn miñmon keykey mindpay gok niñiy, kindik gipay.

## 18

### *Babylon Yap Pikning Gisap*

<sup>1</sup> Pen day niñiy niñnik: enjol Gor angek biyomb yimb mindek bap, semb biyon nimb apek, melik tep nuk ak gek, mankumb biy mangyisek melik gak.

<sup>2</sup> Apiy suk yomb angyi angak, “Miñmon yomb Babylon yap pikning gisap-ow! Yap pikning gisap-ow! Gor gek dawin yomb kun ak, biynimb bap ma mindeningamb; kum koyimb, kichekiy malñiluk, yakir timey, kayn aydik tap gok nep mindeningamb.

<sup>3</sup> Yenen: binuk dinimuñ ak kirgiy, bi yikop gok yip girangying, biynimb miñmon okok gos kun ak nep ñimb. Niñg wayn nuk niñimb ak, biynimb gok kuyip kunep ñek ñimbiy, sakiy aypay. Kiyn man ar biy gok, nuk yip girangiy, timey nep gipay. Pen nuk tap teprep gok diyn angyi per gos niñimb rek, bi man ar biy biysniys gipay gok maniy yomb dipay angak.”

<sup>4</sup> Pen niņnik: minim bap semb biyoņ nimb angak, “Biynimb yand gok am, Babilon kuyip ma wiliknimimb. Tap siy tap timey kiyk gipay gok, nimb yip ma ginimimb. Yiwur yomb kiyk diniņg gispay ak, nimb yip ma dinimimb.

<sup>5</sup> Gach yomb kiyk ak, tap ason rek aran mindip ak mey, Gor kuyip gipay kun ak sakiy ma giniņgamb.

<sup>6</sup> Nuk timey gipay rek niņiy, pen yiwur ñiniņgamb. Babilon nuk biynimb gunap kuyip, ñiņg silik ñimb rek, Gor nup pen kunep, ñiņg silikrimey yimb ak ñek ñiņniņgamb.

<sup>7</sup> “Tap kuņay nep diyn aņgiy, yimb nuk key dand aranimb rek, yiwur yomb diy, apyap pikniņgamb. Nuk aņgip, ‘Yand biyn yandiw rek ma mindpiyn: yand biyn kiwiyn ak mey, siya yomb ar ak bisiniņ mindpiyn. Miker gunap yip dinimuņ rek ma ayip aņgip.’

<sup>8</sup> Kun aņgip ak pen, bi nup yiwur ñiniņgamb ak, Biyomb yimb mindip. Nuk gek yiwan yomb apiy, miñak yomb giy, mon yiniy, siy yomb aņgniņgamb.

<sup>9</sup> “Dawin yomb mon yiniņgamb kun ak, sikum araneke niņiy, kiyņ miñmon okok nimb biyn kun ak yip giraniņgipay gok, simb gek siy aņgniņgambay.

<sup>10</sup> Biyn ak nup yiwur giniņgamb kun ak, chinup kunep ginimuņ rek ayip aņgiy, keykey siņbindoņ mindiy, siy aņgiy aņgniņgambay, ‘Mer-a! Dawin yomb kun ak, yep won biy nep pisnep yap pikip aņgniņgambay.’

11 “Pen yap pikningamb rek, bi biysniys gipay gok, miñiy biynimb gok tap chinup ma tawningambay angyi, simb gek siy angyingambay.

12-13 Tap kiyk kun gok mey: gol, siylpa, kamb sikoy teprep keykey gok, chech napnap teprep keykey gok; tap kuyrep wip keykey gok; mon pilan teprep gok; tap ayen, kapa, mon, kanj eliypend menj tap gok diy gipay gok; ñing wayn, oliyp wel, wiyt mangyi, pilaw tap gok; kanj makaw, siypsiyp, hos gok; tap kanj hos tiwningey liping dand tapay gok; pen biynimb yimb yipund giy miñ tiwning dand amiy, maniy dipay gok sek.

14 “Pen Babiylon nup angyingambay, ‘Maniy siyniñ diniñ gipan ak, ma diniñgamban. Gol maniy tap gok pisnep yap amimb; kisen tip ak, ma diniñgamban angyingambay.’

15 “Bi Babiylon yip biysniys gipay gok, Babiylon yiwur yomb dip ak, chinup kunep ginimun rek ayip angyi, gol okok am niñmindiy, siy angying angyingambay,

16 ‘Mer-a! Dawin yomb kil tep kun ak, chech teprep likañ gok ay, gol, biys teprep maniy yomb tawpay ak sek ay gip ak pen,

17 won sinbiy nep, tap teprep kun gok pisnep kurgip angyingambay.’

18-19 “Bi siyip dand tanjep gok sek, bi boskil kiyk gok sek, biynimb siyip ar tapay gok sek keykey sinbindon mindiy, silkul diy, jun ar kiyk biyon diyokying angyingambay, ‘Babiylon nep dawin yomb yimb ak pen, miñiy pisnep timey gip. Nuk mindakniñ, gol maniy tap gok kunaynep mindek, siyip girangying tap kunaynep dipun ak

pen; miñiy won biy nep kurgip rek, chin biynimb siyip tapun gok, maniy wonj chin ma mindip anjningambay.’

<sup>20</sup> “Pen kinjenram biyn nimbip biynimb Gor ker mindpim gok timey gip ak, Gor ninimb ak mey; nup pen yiwur yomb yimb ak ñiningamb. Biynimb Gor yip mindpay gok, miñmiñ giningiy. Gor biynimb nuk gok sek, bi minim anjep nuk gok sek, bi minim tep nup dand amemb gok sek miñmiñ giningiy anjak.”

<sup>21</sup> Won kun ak, enjol kilis yimb bap, kamb yomb sikerek bap di ñing solwara namb ak diyokek, giw yomb angakniñ anjak, “Dawin yomb Babiylon, kamb diyoken kurgip rek ak giningamb. Kisen tip ak ma mindeningamb.

<sup>22</sup> Babiylon biynimb tep gakniñ kamep angyiñg, gawimb, giyta, dachiñ tap gok pikyiñg ma mindeningambay. Wonj ar keykey gipay rek, ma giningambay. Wiyt manjiy piksimbjakiy pilaw gipay rek, ma giningambay.

<sup>23</sup> Biynimb lam melik namb kun ak, tip ma niñningambay. Biyn bi namb kun ak, ma diniñgambay. Dawin yomb kun ak, pisnep kurginingamb. Bi sikyim gep kiyk gok, biyomb yimb mindpay. Pen dawin yomb kun ak kunj giy, yesek anjiy gey, biynimb okok manjiysek nep kuyip kisen gipay.

<sup>24</sup> ‘Babiylon biynimb gok nep, Gor biynimb nuk gok kuyip ñangiñg, bi minim nup anjep gok ñangiñg gipay. Biynimb man ar biy ñapay gok manjiysek, junj ak mey Babiylon nep. Kun gip rek, Gor nup pen, yiwur yomb yimb ak ñiningamb anjak.’ ”

## 19

<sup>1</sup> Pen day niņnik kun ak, biynimb kuņaynep semb biyoņ miñmiñ giyiņg meņg miņgan dand araniy aņgyak, “Gor nuk Biyomb yimb! Biynimb nuk tuņgsak dip gok nep, kim amniņgambay. Chinup kond mindip rek, yimb nup dand yiy ar biyoņ aranjun.

<sup>2</sup> Niņrep giy nep, biynimb gok kuyip yiwur ñimb. Kinjeņram biyn kun ak, Gor nup kirgiy monmon giyiņg, biynimb nup gok kuyip pikayiņg gek, biynimb miñmon okok kuyip kinjeņ yomek, kunep giyak ak, nup niņind yiwur yomb yimb ak ñimb aņgyak.”

<sup>3</sup> Kun aņgiy, tip ak meņg miņgan dand araniy aņgyak, “Gor nup yimb dand aranjun! Dawin yomb Babiylon yiwur dakniņ, sikum ak perper nep aranimb aņgyak.”

<sup>4</sup> Kun aņgeyak, bi minim tuņgasikep ñin jiwiy andikiy nokom gok sek, tap pilkind onep kaņgol ayak gok sek Gor siya kiyņ ar bisiņg mindek kiñiņ siņak koņgim yimiy aņgyak, “Niņind yimb! Yimb nup pernep dand aranjun aņgyak.”

<sup>5</sup> Kun aņgeyak, minim bap siya kiyņ mindek siņak nimb aņgiy aņgak, “Ñimb biynimb yomb akan, biynimb tam okok akan, yerip rek mindiy pen, Gor nup biyomb yimb aņgiy pirikiy, direp gipim gok; yimb nup ak dand aranimimb aņgak.”

*Krays Biynimb Nuk Yimb Gok Kuyip Dand Miñmon Nuk Amek, Miñmiñ Giniņgambay*

<sup>6</sup> Kun aņgakniņ niņnik: biynimb kuņaynep ñiņg sinj piņiy aņgip rek akan, timuk aņgakniņ giw yomb aņgip rek aņgyiņg aņgyak, “Gor nup yimb

ak dand aranjun! Nuk miñiy biynimb gok kuyip mangyisek kond mindip.

<sup>7</sup> Kun ak tep gakniñ miñmiñ giyiñg, yimb nup ak dand aranjun. Yenen: Siypsiyp Ñiluk ak biynuk nup diniñgamb ñin ak wip rek, biyn ak korip nup amniñg, minj moka giy mindip.

<sup>8</sup> Biynuk nup, Gor chech tund ñiñakol giyiñg mindip bap ñek yimiy, nuñgumiy nup kond mindip angyak.” [Chech tund tep yimb kun ak mey, Gor biynimb suñ-tep nuk gok, nup direp gipay angyi apiyn.]

<sup>9</sup> Pen enjol ak yip angak, “Gor minim nuk niñind yimb anqip ak angen tiknimin. Nuk anqip ‘Biynimb Siypsiyp Ñiluk ak suk angek am nuk yip tap yomb ñiñningambay gok; miñmiñ yimb giniñgambay anqip’ angak.”

<sup>10</sup> Pen enjol ak kun angek, yand tomb angin nup siñak koñgim yimiy, nup lotiw giyn angen, yip angak, “Yand Gor mer! Gor nup nep angninimin. Yand yikop bi nup wonj giñemb bap. Nimb Jiysis nup yimb dand aranyiñg, Gor nup direp gipim rek gipiyn. Biynimb Jiysis nup yimb dand aranjun bay gok, bi Gor minim angep gok, Gor Kawnan ak yip mindiy, nup yimb dand aranjun bay rek gipay angak.”

### *Krays Kanj Hos Tund Ar Biyon Bisgiy Tangek*

<sup>11</sup> Pen tip ak niñnik: semb biyon miñgan yikiy, bi bap kanj hos tund ar ak bisinğ mindek. Bi kanj hos ar bisinğ mindek kun ak, yimb nuk omiñal: bap niñind, bap chinğrep-gip. Nuk biynimb gok kuyip yiwur ñimb ak; monmon ma ñimb, gipay

rek ninjy ñimb. Kun ak biynimb gok yip penpen giy ñañgjiwip ak, suñ-tep nep mindiy ñañgjiwip.

<sup>12</sup> Windin nuk ak mon mañlan rek. Biynimb mañgiysek kond mindeningamb rek, kiyñ aypay arband kuñaynep, jun ar nuk biyon ayek mindek. Awinben nuk biyon, yimb bap tikayek mindek. Pen yimb nuk kun ak, biynimb yikop gok ma niñbay; nuk nep niñimb.

<sup>13</sup> Chech tund ay mindek ak, likañ ak tawek amnak. Pen yimb nuk ak, “Gor minim mañgiy won nuk” apay.

<sup>14</sup> Amiybi semb biyon nimb gok, chech tund teprep yimb gok keykey aydiy, kanj hos tund ar gok keykey nep bisinğ diy, nup kindik giyak.

<sup>15</sup> Meñg miñgan nuk biyan, baynat kind yimb bap aranjakak. Baynat kun ak diy, biynimb miñmon keykey ayak rek, kiyk yip penpen gi wiyniym giy, ayen kur par bap diy, kuyip kond mindeningamb. Pen wiyniym giningamb ñin kun ak, kiyk wayn mañgiy rek mindey, Gor Biyomb tap okok mañgiysek gayak ak, nup yiruk yimb gek mey, bi kun ak nup angeningamb, kuyip di Gor wayn mañgiy tawsimbjakip kiwok miñgan ak yokiy, tawsimbjakningamb.

<sup>16</sup> Pen chech nuk okok sek, miley kind nuk okok sek yimb gunap tikiy angyak, “Biyomb biy mey; bi kiyñ yomb gok sek, bi yikop gok sek Kiyñ yomb kiyk ak mindip angyak.”

<sup>17</sup> Pen kisen giningamb rek ninjy niñnik: en-jol bap pumb windin namb sinbiyon mindiyñg, yakir wiñind tanğeyak gok kuyip, suk yomb anğiy anğak, “Gor nimbip keñmañgiy yomb ñining gisap



nen, ap nan-giy ñiñnimimb!

<sup>18</sup> Apiy, bi kiyn gok kuyip ñimbiy, amiybi kond mindep yomb gok ñimbiy, amiybi yikop gok ñimbiy, kanj hos gok ñimbiy, bi kanj hos dand tapay gok ñimbiy ginimimb. Pen biynimb kalam-bis wonḡ gipay gok, yikop mindpay gok, biynimb yimb yomb mindip gok, yimb ma mindip gok mañgiysek, mumbwak kuyip gok ñiñningambim anḡak.”

<sup>19</sup> Pen won ak niñnik: tap ayndik ak sek, kiyn yomb man ar biy gok sek amiybi kiyk gok dap nan-giy anḡyak, “Bi kanj hos tund dand tanḡip ak yip, amiybi nuk gok yip penpen ginjun anḡyak.”

<sup>20</sup> Kun anḡyak ak pen, Bi hos tund dand tanḡek ak, tap ayndik ak sek, binuk biynimb gok kuyip tom giyḡḡ, tap mageprek gak ak sek di, mon mañlan salpa sek yinimb miḡan ak yokak. Pen tap ayndik binuk kun ak, nind biynimb kuñaynep tom gek, tap ayndik kil nup ak diy, tap nup rek niñiy gayak ak anḡniñyak.

<sup>21</sup> Pen Biyomb kanj hos tund dand tanḡek ak, baynat meḡ miḡan nuk biyan nimb aranjakak ak diy, amiybi yikop gok kuyip mañgiysek ñanḡek, yakir gok apiy, mumbwak kuyip gok ñimb ñimb mer niñiy kirgiyak.

## 20

### *Seytan Simiy Wan Tawsin Kalambis Mindeniḡamb*

<sup>1</sup> Pen day niñiy niñnik: enjol bap semb biyon nimb sen kilis yimb bol ak diy, kaw miḡan yomb kiruḡ ma tikak kiywur ak diy, dand owak.

2-3 Dand apiy, ñom nim tom gep wosrey tikiy mindip ak nup chichiy diy, biynimb gok kuyip tip ak tom ma ginimuñ angyiy, tiwning dam kaw mingan kun biyan yokiy, kinjen giñiy, lok girep yimb gak. Gek mey, nuk kun okok kalambis mindek mindek, simiy onep wan tawsin amek, tip ak wisik yokey apiy, sikoy won bap yikop giranjeningamb. Ñom nim tom gep kun ak mey, Seytan nep.

<sup>4</sup> Pen niñnik: Gor angayak biynimb gok ap, biynimb yomb bispay siya ar gok bising mindeyak. Pen biynimb tap ayndik ak nup asikrep giy, kil nup jun biyon akan, ñin mangiy kiyk ak ma diy, Gor apiymiñay kuyip nep chingeyak ñangyak gok niñnik. Kiyk kim mindiy, Krays yip wonj giying, biynimb gok kuyip kond mindey mindey, simiy wan tawsin ak yinak.

<sup>5</sup> Pen biynimb yikop kumyak gok, ñin namb kun ak ma tikjakyak. Minim aspiyn biy, Gor gek nind tikjakpay biynimb gok kuyip nep aspiyn.

<sup>6</sup> Biynimb nind tikjakpay gok, Gor biynimb suñ-tep nuk mindiy, tep gaksiñ nep mindeningambay. Tip ak kumiy, miñmon timey ak ma amningambay. Biynimb kun gok: bi Gor nup simbongep gok nup direp giyingipay rek giying, Ñinuk Krays nup direp giying, nuk yip jimñiy, biynimb gok kuyip kond mindey mindey, simiy wan tawsin ak amningamb.

### *Seytan Yiwur Yomb Diningamb*

<sup>7</sup> Simiy wan tawsin kun ak amek, Gor enjol nuk gok kuyip angeningamb, Seytan nup kalambis wisik yokey,

<sup>8</sup> am biynimb miñmon keykey mindpay rek, kuyip tom giniᅅgamb. Biynimb kun gok mey, Gong yip Meygong yip. Seytan kuyip gos ñek, penpen giniᅅg, kamb kilup ñiᅅg solwara gol okok kuᅅaynep mindip rek ak wiᅅniᅅgambay.

<sup>9</sup> Tiwin gok tiwin gok apiy, dawin yomb Gor gos niᅅimb ak sek, amiy layn nuk gok kuyip sek piᅅiy kus kus geyak; mon maᅅlaᅅ ak semb biyoᅅ nimb apiy, kuyip yin simbok amnak.

<sup>10</sup> Pen Gor enjol nuk gok, bi biynimb miñmon okok nimb tom giy, lipiᅅg dand wak kun ak nup, dam mon maᅅlaᅅ salpa sek yinimb miᅅgan ak diyokyak. Tap ayndik ak yip, binuk biynimb gok kuyip tom giniᅅgamb ak yip, nind miᅅgan kun biyaᅅ am minderik ak mey; yiᅅgong giy kawsek, kisyimken meliksek yiwur dinep min-deniᅅgambay.

### *Kor Yomb Kisen Yimb Ak*

<sup>11</sup> Pen siya kiᅅᅅ tund yomb bap niᅅiy, bi ar kun ak bisgip ak niᅅiy ginik. Biyomb jel gip kun ak awakniᅅ, semb biyoᅅ sek, man biy sek liᅅg key okok amek, tip ak ma niᅅnik.

<sup>12</sup> Pen biynimb kumyak gok; biynimb yomb gok, biynimb gap gap gok maᅅgiysek apiy, kiᅅiᅅ kun siᅅak jak mindeyak. Buk kiyk kim mindyiᅅg giyak giyak rek niᅅiy tikayak gok mikal gay, buk biynimb perper mindeniᅅgambay yimb tikyak ak, kisen mikal giyak. Mikal gay, yerer giyak ak niᅅyiᅅg, kuyip bilokak.

<sup>13</sup> Pen Gor biynimb ñiᅅg solwara akaᅅ akay kumiy, am kor yomb giniᅅg kond mindeyak gok

manjiysek dand apiy, kor kuyip ak niñiy yerer giyak ak niñak.

<sup>14</sup> Niñiy, kuyip angyokak mon manlan salpa sek yinimb ak. Mon yinimb ambay kun ak mey, tip ak kumbay apun.

<sup>15</sup> Pen Gor nuk perper mindeningambay buk biyan niñ-tep giy, biynimb yimb kuyip ma mindek gok angek, manjiysek diyokyak mon key yinjab kun biyan.

## 21

### *Mankumb Biy Sek, Semb Biyon Sek Key Kindiknimb Ayak*

<sup>1-2</sup> Pen niñnik: Gor mankumb biy sek, semb kamb biyon sek gek, key kindiknimb ayak. Niñ solwara mindyngip ak, ma mindek. Pen Gor dawin suñ-tep nuk Jerusalem kisenimb ak, yokek awak. Dawin kil-tep kun ak, biyn gok bi dining, chech teprep ay kond mindpay rek ak mindek.

<sup>3</sup> Pen siya kiyn mindek namb siñak, suk yomb bap angyi angak, “Miñiy tikiy, Gor nuk key biynimb gok yip yingong giy mindeningamb. Kiyk biynimb nuk mindey, nuk kiy yip nep mindeningamb.

<sup>4</sup> Miñ nindnimb ar ak key mindyngipay, miñiy ak pen key yimb mindeningambay. Gor kuyip kond mindek, miker ma diy, yiwur ma diy, yikop mindeningambay. Biynimb bap ma kumingambay. Simb gek, siy ma angningambay angak.”

<sup>5</sup> Pen Bi kiyn siya yomb ar bisgak ak yip angak, “Yand apiyn ak mey, nind mindyngipim

rek ma mindeningambim; miñiy kisenimb ar ak mindeningambim angak.” Kun angyiy, yip angak, “Minim aspiyn ak tikninin. Minim kun ak, minim niñind yimb, biynimb gok pisnep niñiy diniñgiy.

<sup>6</sup> Yand Bi tap okok mañgiysek alwol gaynik ak, mindnep mindpiyn. Yerer gining gos niñnik ak, mañgiysek gi dipiyn. Biynimb an ñiñg nen gonimuj, yip ker apey, kuyip ñiñg kilam jiwiy apek, ñimbiy perper mindeningambay ak, yikop angen ñiñningambay.

<sup>7</sup> Biynimb Seytan miker yimb ñek, pen gos kun ak ma niñiy, yip chinñgiy nep mindeningambay gok; yand Nop kiyk minden, kiy mey ñapan yand gok mindeningambay.

<sup>8</sup> Pen biynimb Gor nup chinñgon, chinup miker diniñgamb angyiy pirikpay gok, biynimb yip gosimb niñsipun angyiy, Seytan kind okok ambay gok, biynimb tap timey yimb gipay gok, chip ñapay gok, koyimb pikpay gok, tap yikop gok kuyip angninñbay gok, biynimb tom ginjun angyiy niñbay gok mañgiysek; am mindeningambay mon mañlan salpa sek yin mindip ak. Biynimb wikan kun ak ambay gok, “Tip ak kumbay” apun.”

### *Jerusalem Kisenimb*

<sup>9</sup> Enjol onep ar ak, nind diys kiyk dap lum ar biy songiyak gok bap, ap yip angak, “Apey, Siypsiyp Ñiluk ak, biyn nuk diniñg gisap ak, nip yomiyn angak.”

<sup>10-11</sup> Kun angek, Gor Kawnan ak yip goñ ayakniñ, enjol ak yip diy, dand miñmon yirik yiy akyoñ bap amiy, Gor Jerusalem kisenimb ak

yokek owakniņ niņnik. Dawin kilrep yomb kun ak ñiñakol anġiy, kamb kilmenjik tund tep rek ak mindek.

<sup>12-13</sup> Wariy paryomb ak gi kus kus giy, kinjenram onep wimiņgan ak mindek. Kinjenram kun gok: ayin ar biym omiņal nokom; wisin ar bineņ omiņal nokom; gol bindoņ omiņal nokom; gol bindoņ omiņal nokom. Pen enjol onep wimiņgan ak, kinjenram kun gok keykey kond mindeyak. Kinjenrumb kun gok, day ar biyoņ Jiwda kiñiņ keykey onep wimiņgan ak mindpay rek, yimb kuyip gok tikayak.

<sup>14</sup> Pen wariy kun ak nind gayniņġ, kamb paryomb onep wimiņgan ak parsek ay ay diy, kisen wariy giyak ar kun ak. Kamb par kun gok, bi Siyp-siyp Ñiluk minim dand amemb onep wimiņgan ak, yimb kuyip gok tikyak.

<sup>15</sup> Enjol yip minim anġak ak; dawin yomb kisenimb ak sek, wariy kus kus gak ak sek, kinjenram gok sek ayniņniņġ, yir gol diy giyak bap di mindek.

<sup>16</sup> Pen nuk yir kun ak diy, dawin nonim ak ayniņek, niņnik: biym nimb bineņ tiwelip tawsin amnak; bindoņ nimb bindoņ tiwelip tawsin amnak. Pen kiyonġiy key ma mindek, andip andip kun ak nep mindek.

<sup>17</sup> Nuk dawin yomb wariy kus kus gak ak, biynimb yir ay ñin paņgninbay rek, lum biyan nimb day ar biyoņ ayniņek; wan handret powtiy-pow amnak.

<sup>18</sup> Wariy kun ak, kamb kilmenjik ak diy gayak. Dawin yomb ak, gol teprep galas rek kind anġiy

mindek gok nep diy gayak.

<sup>19</sup> Kamb paryomb wariy kiñiñ biyañ mindek gok, kamb teprep maniy yomb tawpay keykey onep wimiñgan ak, gayek mindek. Day biyañ kamb kilmenjik ak gayak; namb ar ak kamb muk ‘saphaya’ ak gayak; namb ar koyoñ ak kamb tund ‘aget’ ak gayak; tingawip ak kamb minjkimemb, ‘Emerel’ ak gayak;

<sup>20</sup> mamind ak kamb likañ sek, tund sek yingonggak ‘sandonykis’ ak gayak; kañgol ak kamb likañ ‘konliyan’ ak gayak. Pen ar ak kamb walín ‘kriysolayt’ ak gayak; jiy ak kamb minjkimemb ‘beril’ ak gayak; anjip ak kamb walín key yimb ‘topas’ ak gayak; wanjrem ak kamb minjkimemb sek, walín sek yingonggak ‘kriysopres’ ak gayak; anjip ak kamb muk key yimb ‘hayasin’ ak gayak; wimiñgan ak kamb likañ am-yimb ‘ametiys’ ak gayak.

<sup>21</sup> Kinjenrumb onep wimiñgan yikyak gok, kumbap rek onep wimiñgan ak diy gayak. Dawin yomb kun ak, lor gok gol tep tep diy gayak ak mey, galas rek kind yimb anjiy mindek.

<sup>22</sup> Pen Gor Biyomb tap mañgiysek alwol gayak ak sek, Siypsiyp Ñiluk ak sek mindpiyr rek, dawin yomb kun ak, Gor angninep korip bap ma mindip.

<sup>23</sup> Pen Gor apiyminay melik yimb mindpiyr rek, pumb takin wong bap ma mindip.

<sup>24</sup> Biynimb miñmon keykey gok, dawin yomb kun ak, sup melik tep ak niñyিং tanğeniñgambay. Kiyñ keykey gok, tap teprep kiyk mindeniñgamb gok, dand miñgan kun ak amniñgambay.

<sup>25</sup> Pen dawin yomb kun ak, kisyim ma

winiᅅgamb; kinjeᅅ gok ma giᅅniᅅgambay. Minek minek yikiy nep mindeniᅅgamb.

<sup>26</sup> Biynimb miᅅmon keykey gok, tap teprep dawin kun ak yimb dand aranemb gok, dand miᅅgan kun ak amniᅅgambay.

<sup>27</sup> Gor tap asikip gok, miᅅgan kun ak amniᅅgiy rek ma mindip. Miᅅ tom gipay gok, Gor kuyip niᅅek nambiᅅ diniᅅgiy rek gipay gok, miᅅgan kun ak ma amniᅅgambay; Siypsiyp ᅅiluk biynimb nuk perper mindeniᅅgambay aᅅgiy yimb kuyip tikayak gok nep aᅅgek, miᅅgan kun ak amniᅅgambay.

## 22

### *ᅅiᅅ ᅅimbiy Perper Mindeniᅅgambay Ak*

<sup>1</sup> Enjol kun ak, yip ᅅiᅅ tund teprep ᅅimbiy, perper mindeniᅅgambay ak yomek niᅅnik. ᅅiᅅ kun ak, Gor yip, Siypsiyp ᅅiluk ak yip siya kiᅅᅅ kiᅅᅅ apiymiᅅay bisgipiyᅅ siᅅak nimb kilam jiwiy,

<sup>2</sup> dawin yomb lor namb ak apiᅅ amnak. ᅅiᅅ gol pis pis mon ᅅimbiy, perper mindeniᅅgambay gok jakak. Mon bind kun gok, simiy nokom nokom takin keykey anep wimiᅅgan ak, maᅅgiy piyip. Pen mon kas kun ak, biynimb miᅅmon keykey gok kuyip, gek suᅅ aynimuᅅ rek nep mindip.

<sup>3-4</sup> Dawin yomb kun ak, biynimb asiᅅ gok mindeniᅅgiy rek ma ayip. Gor yip, Siypsiyp ᅅiluk ak yip siya kiᅅᅅ kiᅅᅅ apiymiᅅay ak, dawin yomb namb siᅅak ay biᅅiᅅ mindrikniᅅ, biynimb gok jomluk kuyip apiymiᅅay niᅅyiᅅᅅ, lotiw



giyiqg yimb dand araniᅅgambay. Siypsiyp Ñiluk yimb nup ak, awinbeᅅ kuyip biyoᅅ tikayey mindeniᅅgamb.

<sup>5</sup> Kisyim ma winiᅅgamb. Pen pumb yip, lam yip biynimb gok kuyip, melik yomimb rek ma yomniᅅgamb; Gor Biyomb yimb ak melik kiyk ak mindakniᅅ, kiyk perper kiᅅᅅ rek mindeniᅅgambay.

*Jiysis Maᅅ Mindip Winiᅅgamb!*

<sup>6</sup> Pen enjol ak yip aᅅgak, “Minim aspiyn kun ak minim yesek mer: niᅅind yimb. Niᅅiy diniᅅgiy. Gor Biyomb, Kawnan nuk bi minim nup aᅅgep gok, gos ñek minim aᅅgyiᅅgipay ak nep, yip yokek apiy, biynimb Gor nup direp gipim gok, maᅅ mindip giniᅅgamb minim ak aᅅᅅiᅅmbiyn aᅅgak.”

<sup>7</sup> “Niᅅim! Maᅅ mindip niniᅅgayn. Biynimb an minim aᅅgip biy kisen giniᅅgambay gok, Gor gek miᅅmiᅅ giniᅅgambay aᅅgak.”

<sup>8</sup> Yand Jon, tap gak kun gok sek, enjol minim aᅅgak kun gok sek niᅅdiyiᅅᅅ; apyap tomb aᅅgin nup siᅅak koᅅgim yimiy, nup lotiw giyn aᅅgen;

<sup>9</sup> yip aᅅgak, “Mer! Yip kun ma ginimin; Gor nup nep aᅅgniᅅnimin. Yand bi yikop nup woᅅᅅ giᅅiᅅmbiyn. Nimb biynimb minim mindip buk biy kisen gipim gok sek, namam Gor nup minim aᅅgep gok sek Gor nup direp gipim rek gipiyn aᅅgak.”

<sup>10</sup> Pen yip aᅅgak, “Kisen giniᅅgamb minim tikpan kayan ak, ma weyiᅅᅅ chichiy ginimin. Yenen: maᅅ mindip, minim tikpan rek maᅅgiysek giniᅅgamb.

11 Kun ak nen, biynimb timey gipay gok, timey ar ak nep gi mindeningiy; biynimb tep gipay gok, tep ar ak nep gi mindeningiy. Biynimb tap siy tap timey giy, asiñ mindpay gok, asiñ nep mindeningiy; biynimb suñ-tep mindpay gok, suñ-tep nep mindeningiy aṅgak.”

12-13 Jiysis aṅgip, “Niñim! Yand mey, Bi siñok kiñiñ giy mindiy, mind dand apiy, mindnep mindeningayn. Junj yand nep; piñ ak yand nep mindpiyn. Mañ mindip niningayn. Ñin kun ak, nimb biynimb yand gok yip yerip yerip gipim rek niñay, pen kunep direp yimb giningayn. Yand Bi kiñiñ giy mindiy, mind dand apiy mindnep mindeningayn. Junj ak yand nep; piñ ak yand nep mindpiyn.

14 “Biynimb chech kiyk ñiñg pikrep yimb giy mindeningambay gok, miñmiñ giningiy. Mon mañgiy ñimbiiy perper mindeningambay ak ñor ñimbiiy, am dawin yomb suñ-tep miñgan ak sikiy amningambay.

15 Pen kayn ayndik gok, dawin suñ-tep kun ak amningiy rek ma ayip. Biynimb kunj gipay gok, biyn siy bi siy gipay gok, tap timey gipay gok, chip ñapay gok, tap yikop okok gor chin aṅgiy aṅgniñbay gok, tom gun aṅgiy niñbay gok mis biyañ nep mindeningambay.

16 “Yand Jiysis, enjol yand ak aṅgyoken, am nimbip biynimb miñmon keykey yip chingipim gok, minim aṅñimb. Yand bi siñok, Depiyt tik dand amiy tikey, Biyomb mindeningamb aṅgyak ak nep. Yand mey, gap poṅglin yomb miñmon

yowniᅅ gakniᅅ, aranjakniᅅgamb aᅅgyak ak mindpiyn.”

<sup>17</sup> Pen biyn siᅅok, Bi yand ak, yip pisnep diy dand amniᅅgamb aᅅgip ak sek, Gor Kawnan ak sek ‘Winimin!’ apiyr.

Biynimb minim kun biy niᅅiy diniᅅgiy gok kunep, ‘Winimin!’ aᅅgniᅅgiy.

Nimbip biynimb kuᅅam kinjik gek mindpim gok, maᅅgiysek wim! Apiy, ᅅiᅅᅅ ᅅimbiy perper mindeniᅅgambay ak, yikop diy ᅅiᅅᅅnimimb.

<sup>18</sup> Nimb biynimb minim kun biy aᅅgey niᅅnimimb gok, niᅅrep ginimimb. Biynimb minim kun biy niᅅiy, minim yesek gunap sesek yinᅅoᅅᅅ geᅅniᅅgambay; Gor pen gek, miker yomb aᅅgip gok kuyip diniᅅgamb.

<sup>19</sup> Pen biynimb minim kun guniy, day gunap ma niᅅjun aᅅgiy kirgeᅅniᅅgambay, Gor kuyip pen mon maᅅgiy ᅅimbiy perper mindeniᅅgiy aᅅgip ak ma ᅅiy, dawin suᅅ-tep perper mindeniᅅgambay ak sek mer aᅅgek, ma amniᅅgambay.

<sup>20</sup> Bi minim biy niᅅind nep tikip aᅅgiy niᅅimb ak aᅅgip, “Yaw! Maᅅ mindip niᅅniᅅgayn aᅅgip.”

Biyomb Jiysis! Apan kun ak niᅅind apan! Kasek winimin!

<sup>21</sup> Biyomb chin Jiysis nimbip, Gor biynimb nuk gok, mapin diyiᅅ nep mindonimuᅅ. Tep.

**Kalam Baybol Buk Gor minim nuk kisin  
angayak  
The New Testament in the Kalam Language of Papua  
New Guinea  
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

---

PDF generated using Haiola and XeLaTeX on 18 Apr 2025 from source files dated 31 Aug 2023

1491c109-3ee2-5565-9b83-06c480168547